

四當齋集

丁丑夏邨章題





四當齋集卷七

長洲章 鈺

七文

王文成公象贊

人心陷溺若水東馳汎濫衡決何術挽之公有學說曰致良知直下承當息狂醒癡內識

真我外忘險巇茲爲儒效百世可師龍場荒驛像在貴州故龍場驛神化所基金昭玉粹天留表儀

神州莽莽大定何時我式遺像慨乎有思

明遺民王道樹先生像贊

先生文恪公鑿口世孫明亡隱胥門外山鄉廟田舍不入城市裔孫季烈學部乞隱君

顧麟士畫胥江屏跡圖摹遺像卷首從大連寄津請題

世臣之裔義不二姓鏟迹埋照昔吾先正天下已任秀才一个能立高節風世尤大聿在

明季貞隱朱用純柏廬徐枋蘇賢鼎足身瘁魂愉宰木誰鄰孝子顧鳳清絕胥江過者必拱

鮑淥飲先生像贊

窮年兀兀與丹鉛爲緣而猶署知不足之榜以自寫其拳拳嗚呼幼書者夥矣疇則如先生之專後有來者一燈誰傳  
秀水金蘭坡先生像贊  
三代渺矣道以器存薛王欵識實導其源先生晚出古歡是敦東南法物來萃邱樊何以傳之繭紙百番津逮後學寶等輿璠攜古攀古篋齋疊軒好或一致功難同論旁及鑒賞不眩犁軒顛船迂閣通夢交魂雅業攸纘猶子從孫奕世文學至今清門叔未壽臧禾中祭尊先生嗣之笙磬篪塤光風霽月如對周元墨林導師景行曷諼

天津華屏周先生像贊  
壁臣閣丞世奎之封翁

乾有四德幹事曰貞家國攸賴扶危定傾公乎體此鬱爲宗英獨立不懼有孚乃亨萬鍾夷視一柱孤擎躬躬翬翬用瘁厥生一家以託一鄉以程仍澹大劫甦此滄瀛擗聲紫色變我三正赫赫庭誥天日晶明荀陳長德後嗣不廢幸哉有子貽之令名澤物宜社教忠宜旌通沽七二長流頌聲

金山吳梅心學師履剛象贊

融齋學派傳者先生括以持志木鐸有聲音胡安定來館高平心向往之爲士作程道山往矣尙穆然於鬱林之石古與滄浪之水清

七姬像贊

畫像在四歐堂藏明拓本七姬墓志後

三心五噉垂矐江東賦命不猶秉性寔同變彼諸姬先後媵潘女君伊何公主隆安黃葉西風大義激我請死君前誰云不可逝者孤鳳從者六鷁雲路先翔以待賢嫡金翠異色赤石等心七絃迸絕如剖素琴鬼蝶相依神鴉自訴不如山塘五人有墓作箴繼張

張羽文

招魂託宋

宋克書

盍築齊雲香升花供蘭亭真帖留此一紙雌霓連蜷用光彤史

楊節母傳贊

無錫楊實甫紹洙奉其繼母陳節母傳乞爲表揚時節母歿四十餘年實甫則篤老矣母慈子孝足風天下企瞻聳慕乃爲之贊

懿歟節母本陳歸楊早喪所天履冰噉霜撫孤成立歸魂茫茫天子嘉之綽楔有光我讀其傳子爲華出母則繼也鞠育如一閱數十年濡淚有述觀子之爲知母之實凡今之人忘親者多親猶可忘遑論其他懿歟節母操行則那幸哉有子砥此頽波龍山崩岩鸞

溪漣漪慈雲雖遠清風自吹我欽其節益懷其慈敬書影堂慨乎有思

胡孝女傳贊

孝女江甯胡氏濱江鄉小廠圩人父家聲世農家也少而從父習勞未嘗入塾宣統二年庚戌六月初二日夜將半有盜匪十餘毀門入劫按家聲於地手利刃威獨悉索所有少遲回間被傷六處野曠月黑四無居鄰家人又以凶燄不可當且噤且戰不知所爲計女始猶哀求於匪旋以將致死其父也攬身障父亂刃交下中要害而踣匪乃肆掠颺去父得免視女則僵血泊中氣絕久矣時年一十有四越十載庚申吾友謝受之觀察以狀告爲慨然於數千年敦紱彝倫之天下雖屈勢窮運極而激發於鄉里弱女子者猶轟轟烈烈如斯也是可尙已贊曰

嗟嗟今世邪說誣民我觀人子亦非昔倫偉哉孝女扞父戕身單門弱質致此何因其因伊何天地正氣一往直前無怖無畏節士貞臣得此而貴借曰無之不如鸚鵡昔者聖人教從孝始舍生得仁迺一女子撐拄兩閒不在都士黎洲有言不我迂矣人心陷溺烈於猛洚之子之行賢喟愚懼百行孝首以式南邦湯湯揚子此亦娥江

林門謝貞女像贊

衛風柏舟兩髦我特毛公傳之髦爲子飾是共姜開守貞之先孔子嘉之錄以爲式後儒  
援禮各抒胸臆誠足彌人道之窮而奚以立人紀之極懿歟女士矢言不食竟生異而死  
同與共姜而合德乃我 先朝章明風烈之所遺而令今之喪失本心者聞風而失色請  
配孝娥大書深刻

恭忠親王外孫女費烈婦傳贊

大義所在難乎一決如彼志士赤石不奪秉氣也正見理也真天上有月人閒無春於鑠

賢王外孫有此豈況中壘拾遺彤史

傳爲烈婦弟溥德作

賀蘭萬丈貞厲題碑章明風教式此王姬

業師沈賚卿先生諱紹僑祭文

嗚呼吾師竟止於斯陡頽嵩構天何不慈犖犖大者予嘗莫知感恩知己請白其私我初

負笈惟師之昆

師三兄諱紹傑字廉卿

問年舞勺詩禮初溫芭方問字玉遽招魂有瞽失相偃偃何

奔師顧而嘻云爾也可爲悼哲翬以愛推我我確我砥我揚我簸豈止三月春風可坐嗟  
我嚴君其時居貧燈續斷帶飶開吹塵駒跳犢觸不羈不馴有脯十束羊瘦尠倫幸哉吾

師壹是寬假批朱抹鉛時時獎借郡縣小試霜晨月夜借裘添衣擎燭覓舍齊轡整鞭若  
馬就駕臨行又回若姆訓嫁紀述師恩非筆非舌春之嘘枯水之飲熱一十餘年髓決心  
折豈沉母弟弦姻更結師從妹歸  
子弟鑑今歲秋九我隨師行尙顧小子謂當有成小至初屆猝  
傳師病頗聞瞑眩願見未請豈圖翌晨一走闖來躑躅哭寢不知所哀一瞑萬世天乎痛  
哉師之遺言明明在耳師之遺文明明在紙登師之堂撫師之几獨師音容已矣已矣戴  
人一惠感激漣洏如師厚我顧曰不悲師徂何所我報何期汎瀾陳奠儻欲予卮

吳江吳祭酒師祭文

嗚呼世變乃至於斯前事已矣不必贅辭獨其封狼毒虺之躑躅詡談者在國家根本之  
地而人心震動并不遺恤緯之嫠臺防既撤則江浙閩廣諸行省甚累卵而可危猶之重  
門洞開而管鑰則他人主持且其狡謀尤在內地通商一款閒閒下子悉成殺著如國手  
之布棋蘇臺乾淨土又將是窟是宅而腥臊羶膩鬱蒸於鶴市與雞陂士生於此穉乎如  
泛梗於絕港煥乎如靡萍於中遠而凡逆料他日者幾幾使祝宗祈死而不願身親見之  
而吾師之吉祥善逝乃不先不後適丁其期小子無狀且爲吾師幸而不徒爲吾師悲吾



師平昔固嘗獨居深念齋嗟涕洟特持躬慎密而風旨所表襮弟子不得記門外不得窺英靈未沫必將直排天閭使沈醉之大帝一噴一醒無夢夢於天位之尸 列祖 列宗之神聖英武庶幾佑啟其後俾開中興之運建長治之基其輔翼而成化者近若曾左胡彭諸宗臣亦得陰相助翊旋天紐而斡地維萬一九州之大人人才熄滅猶是山川猶是種姓亦必稍假時日毓秀而孕奇而後正氣以復邪氣以掃還百年以前之舊重覩夫乾坤之清夷吾師亦得淩雲一笑而引滿於一卮否則生者不能爲死者可爲而不爲吾師亦必標擗於雲路不敢諉諸大化之推移吾徒無聊之言嘗謂今日得志大都小夫與纖兒觀老成之代謝疑九京之下爲君子道長之時斯言而信吾師今日方將吐未吐之氣伸未伸之眉平生親契爲銖所敬事者若長房一老尤將歡然道故以相娛嬉較之柴立人世塊獨無語蒿目者滄海橫流之局沈吟者長安不見之詩孰舒孰促孰鬱孰怡吾師之去此而卽彼曾不勞揲著而灼龜且夫心喪者從學之至情哭寢者禮家之成規蒙也何心乃獨顛倒迂謬其詞則所以激而出此者吾師必昭鑒乎在茲是下顧方來無涯之慟也而非僅區區感恩知己之私

公祭嚴侍郎文

年月日崇化學會同人等敬以清酌庶羞致奠於範孫嚴侍郎之靈曰學貴通時尤貴稽古嗚呼我公用心獨苦古者云何義理訓詁爲國之粹爲人之譜寶書重譯覃及西土安得自誣視爲朽腐翬翬我公凜焉四顧於易取兌於禮取醴相輔相成別開學府作育海濱庶幾鄒魯有堂洞明繫公之宇萬卷美富亦公所具坐聽弦歌忘寒忘暑莞爾而笑此中翹楚吳地有學高平創舉教始鄉人公儀其矩期望無窮大命有數伏枕淹旬此焉厯注天不憖遺俄悲大暮罷社輟春甯惟學侶忝在同人感公鼓舞前路何知公當呵護盛德大業中外欽慕姑述一端雲霄毛羽絳闕道山神游何處薦此馨香諒公不吐尙饗

仁和吳子修年丈哀詞

後宣統辛亥之十三年甲子三月聞我年丈子修吳先生考終杭第之訃老成代謝海內驚歎道遠未克行弔敬陳哀悃昭告几筵詞曰

嗚呼古人有言主辱臣死借曰未死亦苟活耳其在於今翮其反爾亦姑謀樂藏身海市天步艱難罔知底分痛云何忍而爲此喬木世臣東南夥矣積鬱損年乃有君子彼君

子兮延陵之吳玉堂老鳳軒翥上都屢拜 特簡大雅輪扶繩祖翼子當今誰乎昊天不  
弔一星云徂夢爭王室將伯誰呼心則葵藿身則菰蘆雞羣中散魚腹左徒抱石懷沙一  
瞑亦易委蛇委蛇曰有所冀彼昏不知因以爲利甘聽羣魔噉人而戲報國文章傳惟忠  
義曷爲傳之用存人類人壽幾何終焉憔悴忍淚看天銜悲入地嗚呼哀哉小子無狀辱  
在下風浮雲世改孤月心同湖山有美我亦欲東人天遽隔此憾何窮平生師友侍講鄒  
公腐心時變減食告終丙戌翰苑雙峙華嵩以爲臣鶴爲天下勸忠嗚呼水非水兮山非  
山春非春兮夏非夏願眞宰之訴天炳大明於長夜庶光贊乎彛常更斡旋乎元化冀公  
靈之我聞忘衆笑而愚詫嗚呼哀哉

天津嚴持約哀詞

咄咄怪事報君驟死天道與善乃至於此君體充碩君性敦厚戕生縱欲戒之在舊粲粲  
門子責在一身識時俊傑如日方新上侍下教大事未完凡所倚仗千緒萬端那有死理  
更無死相日邁月征前途靡量如何可死君亦知之如何竟死誰爲爲之嗚呼哀哉明德  
之後達人宜有不食其報乃懼厥咎惻惻新悲沈沈舊痛俯仰幾何人生一夢繫君厚我

實推先好世講拳拳於今也少我負先公學會其一忝擁皋比教思無術君覲先公必道  
其由望實不孚抑予之尤嗚呼哀哉攬春暘兮何長歎朝露兮何速撫來日兮大難且爲  
君兮一哭嗚呼哀哉

妻兄王紹延哀辭

木標狗噬滔滔何責獨有我兄丹青金石時風衆勢侈君營魄曾不中壽乃返真宅昏婚  
之故劣及廿年蔣山歇浦綢繆周旋君鏗萬石我倚一羶魚忘驂斬跡判情聯昊天不弔  
侮我 當陽旣移國枋復亂天常變相皆魅反噬胥狼六朝五代無此陸梁走也木彊忍  
爲此態蒙面欲從撫心難昧與蓬俱飄無蔽可采屣屨昏途莫喻流輩君獨然之寓書遠  
道天醉不醒歲寒且保積牘幾尺七更涼燠但吟牢愁不添煩惱歲之二月賦詩寫懷詩  
語云何魂銷春回未幾示疾鴻雁不來將疑將信有夢徘徊不謂考終先立夏日惡讖有  
憑遂成絕筆楚壘壁呵魯縻緯恤卓然完人誰疇誰匹屈曲世閒得死誠幸身後瑣瑣矧  
具真冷獨有邁親悽涼暮景此去冥途得無咽哽我獨諄君可快所爲請排閻闔代訴民  
悲撥亂反正翳天所尸誰令擾擾一至於斯作孽非民罹旤民獨人爲刀砧我爲魚肉痛

並釜煎冤同盆覆眞宰上訴非君而孰庶幾一且上帝聰明光我聖道揚我天聲毋俾大地終焉淪傾英靈如此雖死猶生昔在庚子籌筆見功逮乎辛亥抱節見忠落落大事我知始終我言必踐我文不工平生志事百未一伸故山歸計又失情親牙絃匠斷知契何人津橋獨立愴焉傷神嗚呼哀哉君竟先我劫後一面幽明遂左白日昭回罡風揚簸懸文几筵知君淚墮

元和顧隱君誄

隱君諱麟士字鶴逸晚署西津元和顧氏憑藉世業天賦超人博涉多通畫尤卓絕鉅以同里同庚名志相好者數十年國變以來益申歲寒之契歲庚午四月某日考終城西別墅聞耗之次慨然於蘇賢之流風餘韻至此而盡也傷逝自念誄以達之詞曰  
同輩論交傳人幾箇及身千秋早爲君賀大樹飄零罡風騰簸竟不憇遺一邱長臥聿稽鑒賞過雲一樓畫筌書篋並世尠儔黃門雅尙玉山勝遊風流文采乃詒孫謀君繩其武益恢其界書福墨緣有隆無殺價定青萍珍羅金薤震爆一時乃屬於畫畫人夥矣哲匠云徂南宗正脈豈不在吾造化爲師古也爲徒肯託漫浪嚇彼賈胡書如其人畫亦同理

獨寄高閒一空塵滓蹈矩循規以生以死以槩生平不煩僕指嗟我與君同誕乙丑笙磬  
韋絃其交耐久此外何人曹子雲頡三牛成犇曾開笑口荒荒壞劫歷歷前塵葉落糞本  
終圖買鄰草閒雙笠得話悲辛如何南望處土星淪烽火長途於何赴哭通夢交魂煙雲  
幾幅慰我何真奪君何速君儻有靈亦憐我獨嗚呼哀哉古處兮畢生永訣兮此日珍薺  
兮誰傳清暉兮誰述脫諸苦而遊太空兮固知君淩雲之一唾嗟苕華蕞楚之吾生兮尙  
飾巾而待畢嗚呼哀哉石田雲館世有師也立身有本畫其枝也翳君後起能總持也上  
質古昔寸心知也小雅盡廢今何時也道隨運往焉可支也雲車風馬不可追來者茫茫  
今爲誰是傷心人無涯之一慟不知者或謂此區區交誼之私也嗚呼哀哉

父執俞麗生先生小傳

乙未十有二月二十一日鈺既視俞丈麗生之斂襄事而歸惘惘然有所不釋於懷寒燈  
深坐萬感紛來乃舉君生平行誼爲鈺所親聞者書畀遺孤以表鈺不忍死君之心曰如  
君者可謂今之善人也矣而濟人之急拯人之難尤熟在人口云同治初元蘇垣收復君  
始市一匱羅列磁銅玉石與夫法書名畫之屬榜其齋曰師竹勤勤懇懇日益昌大三十

餘年中皆手自綜理小大井然與交接者曾未見其疾言遽色雖僕隸傭保下之已甚以非禮犯者咸馴之擾之得笑容而去所業介上下之交游食之徒皆挾其所得趾錯於門而攻玉攻石與夫潢治雕鏤髹漆之執一藝以求食者炊火不繼疾病死喪之待醫待殮商於君靡弗應歲盡之夕有所苦累不能自脫訴於君之門君雖不能盡如人意而來告者必少有以調之歲若以爲例冬之衣米夏之時證丸劑泊各善堂局勸募之款約略稱是恤嫠恤孤及老而無依之計月給錢者常數十人丁亥之夏近鄰不戒於火勢張甚幾及君之居救者譁於門曰此地宜無慮俞某不應罹此卒無恙人人推重孚於平日固不獨旣歿之日愴然聞行路太息聲也君少失讀而分別真贋有神解收藏家咸以君所評隲爲可信君於世俗嗜好一不有犯自奉至約而誠篤謙畏同乎儒者鉅與君同里閭先公與君雅故鉅娶於胡君所媒也母弟與君尤習所以相貺者至厚蓋頻年以來君以故人子弟視予兄弟予兄弟亦敬事之至相得也君疾於八月垂起矣又以勞頓體虛致劇月之十九時加西雨雪交下忽心動亟視君君已喘息不能言且言且喘得百餘語子扶於牀目以屬鉅鄭重分明言銘感者三四鉅懷欲有所陳以君氣息不屬未敢竟其詞也

夜向曉而君竟逝矣生道光某年某月某日年五十有四君諱田增吳縣人娶朱氏子二長瑞華早卒娶王氏次瑞銓聘錢氏頗敦厚庶幾承父志云

論曰世變亟矣任卹之風既渺工心計者并舉小民錙銖之利一網盡之問其施舍與否則甯窮奢極侈於無等之欲而於此則不能拔一毛煢煢寒苦訴籲無門而外人乃假仁假義以收拾我人心焉如君者固里黨所仰賴者也積里黨而爲鄉積鄉而爲縣積縣而爲天下其於治化豈云小補君顧僅得下壽豈天道之無知耶抑留以有待耶嗚呼難言之矣獨如鈺者行能無算自信猶難君乃至重大者見託其將何以無負乎君哉蓋輾轉思之而幾於失眠也

### 吳縣王君鑑庭傳

君諱子鑑字鑑庭號秋恬姓王氏江蘇吳縣人也青箱門業烏衣貴游絳冕所興令聞在舊考贈通奉大夫某某公樂志邱園棲神家術廢舉式計然之術岐嶷符商瞿之祥君其幼子也第五之行齊聲於何準無雙之譽方駕於黃童固將荆玉開瑩湘蘭扇烈樽木之枝捧日大鵬之翼垂雲乾蔭俄摧謬臺獨上薛包故產并空取荒引老之資陶朱雅才乃



充候時轉物之用削柱作杙鑄鏡爲刀鄉里大師交口雷歎國家度支所入以鹽課爲一  
大宗江南尤曰奧區淮北是其總會山銅並采尙沿吳淠之風地錢四流爰重劉晏之選  
君銀手能斷金諾弗渝妄言賭乎酬謙潛計邁乎炳燭遂乃甘儕商季相與錢通法孔氏  
之雍容鄙小吏之乾沒綠楊城遠江通海晦之鄉翠竹天寒雪虐風饕之況境至窮力至  
瘁也逋寇鷓張中原魚爛伏莽竊發行李不前嘗於鳳臺縣境猝遭相翔齊斧掠抄僅以  
身免綠林一隊託結寨自保之名綵縵五紋操擒賊得王之券媿徒授首豪右失魂草薶  
禽獮羣欽膽略於是藏名都市戢影江湖獨駕王尼之車拚賣趙岐之餅會逢舊雨試行  
淮網以君夙有幹名傾心委重其之吳陵也精良綜事部分如流江皖鄂湘聯絡一氣維  
時曾文正公方奉 詔辦賊駐節安慶念離務之有關大局也特可幕府郭公嵩壽之薦  
下檄任君清風兩袖不染其脂膏連雲萬艘罔愆乎期會恢恢方格總總員程倣落權輿  
翳君是賴又以圍攻金陵供張軍米船漕車轉不少廝留不韋秦賈曾無居奇之心弦高  
鄭商雅有濟變之略上襄國計下物軍儲君子表微宜告惇史君柴立有骨溪盜爲懷利  
輕鴻毛義重熊掌流亡未集慨分續命之田緩急有資遠仿長生之庫加以少無俗好轉

益多師與人也無町畦律己也無厓岸馬援誡子之牘遠道而必將晏嬰禦寒之裘凋年而始御雖復蔗境從容榆年頽老而考亭近思之錄涑水資治之編靡不決心執權探根躡窟晚歲自號臨履而知君清脩雪白非復尋常者舊也已同治丁卯某月某日考終里第壽五十有七子三人某某以君私淑高平夙有瞻族之志敬承遺矩式廓洪基嗚呼必有三公之遺澤既永世克延毋愧一字之大文豈後生能述勉撮大槩用詔方來贊曰  
充路儒冠匪心伊面蹈義若淵趨利如箭圭璋失榮斗筲淪賤光岳有靈哲人斯見懿彼哲人翼翼欽欽寄跡賈區遊神學林豈儒厥面乃儒厥心佩賢戴哲足恥子衿與物無忤與天爲徒廣施嗇用先聖所僉介石不奪激流豈濡齋入汨出靈衛神扶嗟嗟吳蒙古道幾息實賴老成昭示凱式游晷不延鳳德可卽萬禩千春是傲是則

先考朝議府君事略

府君諱瑞徵字蘭舟姓章氏爲五代閩太傅仔鈞公三十七世孫曾祖考諱何德祖考諱明芑考諱國彪吾家自二十八世祖諡公以後族居諸暨秦南鄉世以務農爲業洎吾曾祖府君始與伯兄明揚公改而服賈明揚公之杭吾曾祖則之蘇迨吾祖考兩世均居閩

門外普安橋遂著籍爲長洲縣人府君之生也當道光中葉時海內承平久府君以有先業可恃事親養志未別謀進取咸豐庚申髮逆東竄蘇城失陷府君初奉吾祖考居於鄉吾祖考病歿府君乃偕先妣奉吾祖妣避難奔走始至太倉旋由閒道返諸暨小住復經甯波渡海而上海而海門所歷多艱險同治初元東南掬定始返會垣家業既蕩盡鉅兄弟輩均幼屢營生業又折閱時鴉片煙方盛行府君念可以起人沈痼者莫如侯官林文忠所定方乃製爲丸藥賃一廛售之額曰存誠堂躬自劑合冀祛世之酖毒亦藉微利以自贍處約守困凡十有七年府君天性仁厚於人有濟輒傾身赴之所處園闢櫛比排難解紛之事書不勝書其爲鉅所親見者對門某姓業軍裝數無禮於我其婦性尤暴戾日撻童養媳無人理適養媳病暑驟斃生前鱗傷發見媳家屬遽以傷斃訴官冀傾其家府君集鄰舍證其病死訟乃寢某夫婦崩角謝謂公誠長者記夙嫌則渠家無全理也新安程君寅亮營運漢上爲吳人某串逃失甚鉅程君持我舊鄰鄂人某君書三千里來蘇訪府君至則待之如舊契爲覓得逃者追款過半程君故善繪事瀕行作圖贈府君題詩其上

上有此去江彎山轉處爲君一步一回頭之句志交誼也盛夏雨中有醉而顛於市者懷

中銀紛墜地諸亡賴伺其醉羣將篡取府君呵止之檢銀扶醉者入室醒解雨霽親送之歸詢之則爲其肆主索逋而得者府君不出而援手殆矣凡此皆大有造於人府君無德色或有所酬則峻卻焉每歲冬月淮北逃荒男婦相屬於道或訴無歸貲輒罄日中所入與之夜廚或斷炊置不問嘗應官中之招督蘇州府學工程事府君朝夕往口不言勞及鉅倖入府庠府君欣然謂於讀書有緣也光緒壬午以後始棄所業爲童子師時鉅亦客授他氏薄有所入府君以先大父大母尙未安窀穸乃購置塋地奉安體魄而以元配先妣周太恭人祔葬穆位旋爲鉅聘定胡氏意將漸完婚嫁稍稍息肩詎意於丙戌秋七月罹傷寒重疾遽爾棄養府君生平篤信感應之說設館時來學者皆坊肆貧苦子弟書數之外必教以爲人大要謂此輩幼年不聞正言將來易流爲不善暇則手錄應驗方贈人至今尙藏數帙訓兒輩至慈愛聞塾師以可造見許輒喜形於色以鉅有志讀書節縮他用購困學紀聞日知錄等書授之鉅少有所知自此二書始也待友事事至誠逝世之日有弔而出涕者持殺生戒尤嚴終歲無一生物入饌旁及惜字惜穀諸細行靡不致意曰非以求福安吾心耳府君生道光丙申六月十二日卒光緒丙戌七月二十五日春秋五

十有一葬先祖考妣塋昭位以鉦官 贈朝議大夫四品銜外務部主事配先妣周氏吳縣祝三公女以端淑稱早卒繼配先妣劉氏別有事略子四長銓殤次卽鉦蘇州府學廩生光緒十五年舉人二十九年貢士 殿試二甲 賜進士出身刑部主事保送經濟特科 召試一等以 奏留辦理本省學務保加四品銜現官外務部主事娶胡氏繼娶王氏三鑑另有傳四鈞殤女三長殤次字直隸鹽山孫江蘇候補道毓驥長子壽芝過門守貞待 旌三殤孫五長飴孫殤次元善江南高等學堂預科畢業生考取京師清華學堂奉派米利堅留學次福善殤次元美元羣孫女四殤者一嗚呼府君之卒也二十有五年矣小子無狀志墓之文闕焉茲以重輯家譜敬述大略如此蓋於府君仁厚之勳迹僅髣髴其勳迹而實無萬一之合也後之人幸承先緒其敬念之哉

先妣劉太恭人事略

嗚呼鉦 旣撰次先府君事略縷述仁厚之勳迹而吾府君一生困頓未嘗一日少抒其懷抱卒未因境貶節類乎古人所歎終窶交謫者實皆吾先妣拮据支持於內數十年不懈乃能臻此至今述之有餘痛焉先妣來歸未逾月卽遭髮逆之難吾家素無餘蓄與吾府

君奉姑奔避歷江浙十數縣閱時三四年斥賣長物殆盡僅乃濟之邦家既復先府君藉賣藥以自贍然歲入多或五六百千少僅一二百千仰事焉俯畜焉與夫親故之贈問饋遺未或缺也府君性又好客好施與偶有羨餘用之輒罄甚且逾其所羨之數吾先妣無懟容無歎望日從事鍼黹以佐菽水中年以後以育多目暈改爲其蠹者晨起炊爨浣濯既畢事則架黶黷爲之篝燈至丙夜始息日用不給甚或斷炊輒舉喫得苦中苦方爲人上人二語與府君相慰藉且以勗兒輩至今猶在耳也先妣以府君委心任運卒無所遇益望鉦讀書敦品以圖自立既遘府君大故則督之尤勤光緒己丑以後鉦既倖捷省試娶有婦矣以薄有文望院課膏獎與門弟子脩脯時有所入又爲人作酬應文字常有以潤其筆硯田歲入稍豐母弟鑑挾其鑒別之能往來滬上遠及燕齊時亦還瞻家用先妣綜理家政一絲一粟必稱量而出如相府君時先妣舉四男三女成立者不及半累有哭殤之痛懷抱至惡食貧居賤所以勞苦其支體者又非凡比坐是中年以後卽覺不支戊子七月感時疾幾不起越歲春夏之交始能起坐由是入秋必病入夏乃愈凡十有餘年鉦自失怙後先妣保愛尤摯客授他氏夜課畢歸侍必諭以毋走荒僻歲時上冢必晴霽

無風方許登舟偶失時遲返則停餐不進鉅仰體先妣微意故自赴省部試外未有離左右十日者癸卯通籍觀政刑部循例一至署卽投牒假歸會大府以江蘇學務需人請留籍辦理鉅遂藉官餼所入稍事潔養先妣至是亦以家政付子婦躬督理之婆婆三年偶以感冒觸發舊疾遽爾棄養鉅等檢視遺篋凡所進諸服御閱年如新故衣數十襲縫綻無不完者卽敝布碎帛亦皆熨帖平正以類儲之蓋先妣之愛惜物力出於天性固非凡爲貧家婦者所可庶幾也捐帳之頃戚舊嗟歎受弔三日鼓不絕聲撫部貴陽陳公親率屬官致奠謂爲賢母足爲世法舉殯時祭者塞途有諭吾家前事者謂先妣至勤至儉以相其夫以致諸子天不負人如此其彰明而較著也先妣姓劉氏長洲泚墅鎮梅堦公女生道光己亥十一月十二日卒光緒丙午十二月十八日壽六十有八以鉅官封太恭人先妣暮年嘗諭鉅等曰汝父於汝祖考妣塋次與元配周恭人分昭穆祔葬閱今幾二十年我百年後不可或震先靈故鉅等別擇地於梅灣之原去先塋三里而近敬奉先妣爲主穴其左右穴則爲鉅昆弟及諸婦將來葬所遵遺命志永慕也所生子女具詳先考事略中宣統三年九月次男鉅謹述

母弟亮之家傳

余高祖生四子或再傳而絕或三傳而絕余祖余父皆單傳余父子四成立者惟余與弟亮之弟生後余二年而幹於余性外和而內鯁懷欲有所陳及意所拂逆者輒茹於心而不遽發發或激於意氣不甚中節又泛愛人不甚擇友所交或狎侮而侵欺之坐是鬱鬱不得志中年遽隕少同余讀書里塾略通大義卽不肯竟讀作字初甚草草弱冠以後好臨圭峯禪師碑與人書問文理斐然則由天分本高而日漸月摩以有得於古也余外舅仁和馥堂胡先生以善鑒古器物名於吳中先府君命弟從之遊弟於市井習氣少卽深嫉獨於古人書畫名蹟與夫金石之學深者篤好腹笥本儉乃雜治各家著錄之書窮晝夜研習奔走江湖所見益富遂於眞贋之別逐物能言其故江浙閒負賞鑑名者咸稱道之余亦有志於是愧弗如也余好以古義繩人弟則通悅而諧俗成立以後弟以習賈別居滬上或遠遊燕齊閒或歸省未幾卽行迨丙午冬先妣棄養嗣弟之繼室又歿時余以先人事畢應兩江幕府之辟移家白下旋奉外部調用全眷北行弟於十餘年來屢經人世險巇艱苦之境覺惟骨肉爲最親余亦堅勸之行由是兄弟同居怡怡之樂不減少



時弟待諸猶子有恩於元羣尤屬意蓋弟中年無子時微露其意余以弟年尙壯未之應也客歲冬初謂北地多寒於氣體不宜結伴返南中度歲音問無閒謂卽當北來不意於今年春杪得類瘡症雜進諸藥遽歿於故里先是己酉正月弟臥病蘇垣余由甯馳往省視幸而得痊此次相隔遼遠猶冀或非重證得藥可愈洎聞耗南歸則歿已九日不及永訣身後事賴歸孫氏妹料理之回憶首途之晨同乘而往言笑如昨濡筆記之不覺淚之承睫也弟名鑑字亮之生同治丁卯十二月十九日卒宣統辛亥四月二十五日年四十五監生花翎同知銜候選鹽大使元配沈氏尙圻守之公女繼娶張氏均無出以余三子元羣爲嗣弟志也嗟乎曩者族中修譜先府君手書余兄弟名寄諸暨入譜忽忽猶前日事曾幾何時余乃爲弟作傳至難堪矣雖然弟歿未數月時局奇變弟則一瞑不視歸侍先人之側余尙全家浮寄未知所終極梏懸解有不可同年而語者弟靈不遠其亦知余言之悲也宣統三年九月兄鈺撰

元配胡恭人家傳

嗟乎元配胡恭人之歿也余手書好將魂倚我牘有淚酬君十字於靈犀蓋心有所甚痛

而未易長言者今屆重修宗譜安忍不書其略詔我後人恭人姓胡氏名玉仁和人父諱  
欽蓮字馥堂母黃氏馥堂先生寓蘇時與府君交契重府君之爲人謂余或繼其志以是  
締媼迨余己丑舉秋闈始成婚時府君己先逝不及見新婦之入門矣恭人爲父所鍾愛  
天性質直無容飾恂識文字來歸之初先妣喜得健婦時余有志讀書輒援据古義謂婦  
者從夫者也必視夫意旨所在如影如響而後能盡婦職恭人則謂夫者婦所天也一門  
之內委曲煩碎彼此難喻之故正復何限不將護之誰將護者用是房闈之間時相警勉  
切磋之義同於諍友吾家世寒儉家政賴先妣主持凡炊爨煩擱之事恭人身任之天寒  
手龜血淫淫出不顧也連舉三男躬自乳哺境既不舒勞苦又甚足以銷鑠其營魄卅歲  
以後遂多疾病淹纏數年而歿恭人之來歸也薄有奩飾吾弟好營運貲本不繼輒影質  
相佐吾舅父鬻堂公以時疫驟逝無以爲殮恭人拔頭上簪付余辦治所以博姑歡而紓  
余急者往往類此然歸余凡十一年未嘗爲之製一衣添一飾也子三長飴孫殤次卽元  
善今留學米利堅三福善殤恭人之歿未數日福善卽病余慟逝者凡房帷几榻一切如  
故夜則挾病兒而寢中宵不寐聽鄰樹鴝鵒作怪鳴手撫懷中兒則竟體火灼時時呼母

而啼追亡念存心如鍼刺福善病半年而死余之痛恭人乃愈久而不可解中心慚負蓋  
不獨貧賤夫妻之可哀也恭人生同治丁卯五月十八日歿光緒庚子十二月二十四日  
年三十四以余官 贈恭人今葬梅灣先妣塋昭位之左一穴宣統三年九月夫章鈺撰

四當齋集卷七終

四當齋集卷七終

...

...

...

...

...

...

...

...

...

...

...

...

...

...

四當齋集卷八

長洲章鈺

圖文八

新甯劉忠誠公神道碑銘

并序 附跋二則

代陸文端

東甯之劉公

聖清中興以楚材宣力為最多其勛伐尤盛者胡文忠曾文正左文襄之外實推新甯劉公公於諸公最為老壽故十數年來萬難措置之國事悉集於公之一身同時封疆大臣亦或各有建樹而始終一節無絲毫遺議則惟公一人校德論功與有宋韓范為近古之社稷臣曠世不一見公獨允蹈之而無愧者也公以諸生從事軍旅於咸豐年間轉戰湖南北江西廣西各省軍鋒所指拔名城殲巨寇無算尤以破石達開悍隊平黃鼎鳳老巢為奇績積功始授廣西按察使同治五年擢撫江西嗣督兩廣光緒朝四督兩江歷時最久所至以吏治為先務勤明廉正以躬率之民被其澤謳歎至今凡公治軍保民之大載在國史及時賢傳記為已詳獨其事關宗社大計及繫天下安危之舉苦心碩畫世蔑有聞宜述一二以詔來者我德宗景皇帝入承大統以來孝事孝欽顯皇后為天

下所共聞外患日棘 德宗銳意變法日不暇給宵小遂藉以生心戊戌八月以後 聖躬既時有不豫逾年復有立大阿哥之 命其時國基震動中外洵洵卒之母子一心之語屢見於 懿旨大阿哥亦旋立旋廢知者謂由公入覲獨對挽回無形及與親臣榮祿力爭以爲不可之故非常之舉公固不言證以公敬念 聖躬一疏 硃筆批答親密如家人有非他勳舊所敢望者則知調護 兩宮功在國本誠可格天理固然也當公入覲之初拳匪已萌蘖畿甸公面告直督裕祿究治不省抵京後請明降 諭旨禁止樞臣剛毅陽奉 上意陰實縱之陛辭之頃 孝欽顯皇后諭曰劉某汝行矣東南半壁盡以付汝矣回任未久卽奉各督撫一體召募義和團之諭時李秉衡以巡閱長江水師駐江陰迎合中旨公與之明定職守並嚴飭礮臺兵輪無得開釁復撥給餉械速秉衡北行秉衡既去江南公乃與長江上下游諸帥定保護東南之策公當時電奏有從古無以邪教立國者信用此輩必肇大禍各國軍隊攻入都城有非臣下所忍言者措詞痛切與中旨大相抵觸幕僚屬稿既竟謂此奏 朝廷之安危繫之一身之禍福繫之應發與否事須慎重公思索少頃以手加頸曰好頭顱準備赴菜市口耳卽命譯發時李文忠奉 命自粵

抵滬拳燄方熾大臣被禍者接踵事機莫測未遽北行公謂大局敗壞將來與各國構和非傳相誰當此任適奉電致英美日本三國請代排解之 國書遂奏請授李全權先與上海各總領事協議得 旨允行文忠之得以不蹈危險卒成款議者其始則公爲之地也各項洋債約以海關充抵時樞府以業與各國開戰電飭止付公以吳淞海面兵艦絡繹此舉果行勢將據關收稅分擾沿海各省則保護之局破矣乃抗疏力爭照約付還他省解不及期者并籌款代任之大信既昭事益得濟其時經畫應付之事千緒萬端而犖犖大者則如此保護之局既定東南晏然各國無所藉口主和議者乃得以相機行事有斡旋之餘地河山再奠微公策殆無幸也公荷封疆重寄數十年平日不以賢智先人一當艱屯盤錯之會則言人所不敢言爲人所不敢爲成敗利鈍非所計而惟知尊重主庇民自完其以身許國之素願薨逝之日 九重震悼不由擬請 特諡忠誠信乎 德動天鑒復出於一時功名之流矣公起家儒素所至風清壁立峻卻饋遺督粵時曾領粵海關督事羨餘至二十餘萬洗手歸公部議移獎子弟辭而不受好讀司馬通鑑通賓判牘之外輒手一卷自撰章奏書劄則仿陸宣公翰苑集體旨遠而詞雅長身玉立目光如電白

鬚清朗手掌如硃砂接人則和藹之中時露剛正之氣平時衣履樸素有類冬烘及朝  
會大典整肅威容則揚休山立儼若神人相傳爲某寺高行僧再世彌留吟詩如有所會  
所謂生有自來者與公諱坤一字峴莊新甯人曾祖武敏祖葵父孔濬字雲樵識江忠烈  
於未遇時曾文正有劉孝子詩壽之曾祖妣氏鄧祖妣氏陳妣氏傅氏蔣三世皆封贈如  
公階娶雷氏贈一品夫人繼娶曾氏封一品夫人無子以弟培一子能紀爲嗣一品蔭生  
委散秩大臣兼襲男爵孫七曾孫二所著有奏議公牘若干卷補過齋文集三卷詩一卷  
雜著一卷生道光十年某月日光緒二十八年某月日薨於位年七十有三追贈太傅兼  
一等男以二十九年二月二十九日葬縣口口新寨村斗笠冲新山之原公子能紀宿衛  
京師來修世講之誼謂余久官禁近狃習國聞奉公行狀乞銘神道之碑時距兩  
宮賓天尙在遏密期內 聖慈 聖孝旣光昭於萬世追懷前事益歎公之所處爲至難  
冲人嗣服典學方新時變未可知則有待膺國家大任者舉皆事公之事心公之心庶  
幾仁賢迭代用以彌丕基而寢羣謀抑亦公報國未竟之志不能不責望於後賢者也詮  
次旣畢畢然有懷銘曰



人臣事君惟一心一心所在天日臨氣數可回虞淵沈安有古昔安有今翬翬劉公起百戰儒效獨爲楚賢殿內而宮府外邦甸拚擲一身塞萬變山頽木壞有謳思日光玉潔無瑕疵惟忠惟誠天所知易名特典疇同之神州前路莽無極欲盡臣道公可則我最其大列幽刻百世聖人俟不惑

跋一

此茗理代吾鄉陸文端所撰忠誠碑文也忠誠薨後公子能紀奉狀乞文端銘公墓道文端以屬茗理逾年文端旋薨茗理此文實成於丙辰之歲篇中所紀忠戰功治績皆舉其犖犖大者而調護兩宮及維持東南二大事尤爲世不及知卽文端知之而生平謹慎不言溫樹亦未必能顯言微茗理此文蓋臣謀國之苦衷殆無由見天若鑒公之誠赤歿後乃使茗理操筆爲之俾撰公傳者得所依據此事關係絕巨非尋常銘墓之文也茗理所以知公軼事綦詳者蓋盡得之王君紹延王君名變江蘇道員久爲忠誠幕客庚子之役文電奏牘悉出其手茗理與王君至戚故能確知當日之情事然則王君亦有功於史乘矣拳匪之變全國震驚忠誠保障東南卒能樁柱危局使後之膺

疆寄者盡如忠誠何至土崩瓦解則知喬木世臣國家所重人之云亡邦國殄瘁古之作詩者殆有隱痛乎若理此文作於國變之後追惟往事倍深感觸脫稿以後謬承商

權因手錄一通並誌其顛末如此丙辰九月鯨溪退士跋時同客津門

鯨溪退士為鈺光緒七年同補博士弟子員友吳縣高君遠香君諱德馨同為先師黃子壽方伯識拔肄業學古堂有年嘗以試用知縣發浙江一投部牒即棄去累充省垣高中各學堂歷史輿地教習以課士有方上聞傳旨嘉獎辛亥國變後以宗旨不同謝事伏居借飲酒種花自遣時鈺辟地天津知其不能自給為作曹邱生於諸家塾強之北來講授經史寓津踰十稔為布置硯席時來棲止極窮魚肉沫寒鳥交聲之樂辛未三月老病歸里甲戌秋作古年政七十所著詩詞及經小學叢藁均未付刊君之為人也外和內介無一言一動之或苟生際玄黃更以一秀才之身不降不辱此真能負讀書人三字者蘭薰雪白庶幾肖之此藁承其手錄為附記生平大槩以代傳志云

乙亥十二月初十日長洲章鈺舊都北池寓齋記時年七十一

跋二

劉忠誠神道碑文書後

新甯劉忠誠公薨逝之後越數年公子能紀以千載之託請於元和陸文端公文端以屬門下士長洲章君鈺代撰正事屬草而文端作古章君不忍負諾責遂成此藁余得而讀之於忠誠公忠君愛國深思遠慮未盡之籌未畢之願一一寫出可以報文端即

亦可以質忠誠矣。顧予侍忠誠五年，荷公知愛感觸前事，有不能不綴數言者。甲子中  
東之役，以無統率，故致蹈唐代九節度覆轍。公以經略重任奉命出關，至則已無能  
爲，遂以海嘯不軍，結局非公志也。庚子團匪，僕與公凜遵陛辭，時面奉懿旨，毅然以  
保護東南半壁爲宗旨，危疑震撼，堅定不搖。時予任淮揚巡道，正當南北之衝，迭奉公  
電飭，獲匪卽予正法，卒無一匪闖入江南。於當時局勢，實具旋乾轉坤之力。後予由甯  
藩調直入都，陛見時公病已劇，慈聖垂詢，具陳其狀，奉諭云：汝可告之服五仁膏，  
最效。予卽電達恩旨，公適於是時薨於位矣。眷睽優隆，千載下猶令人感激也。予任  
江安糧道四年三屆，起運半在道途，於本省治績不獲豫知。逮署蘇藩，署淮揚道，地方  
公事既得奉公指揮，又時時往來會垣，得承顏色，及赴閩臬任，以得再侍爲祝。公曰：吾  
七十矣，知能侍汝否？遂相對潸然。及調甯藩，謂可朝夕趨事，一罄夙懷，無何又有直藩  
之調，公殊不說。電樞請留，未能邀允。自自此遂與公永隔人天矣。猶記臨別之際，公不  
能舍，謂予曰：我看祇是汝尙有心肝，許與之。隆言猶在耳。平生以得事大賢爲幸，讀公  
碑文，益不勝九京隨會之思也。丙辰十月吳重憲記。

海豐吳侍郎仲樸先生跋成命四公子稼孫隴書稼孫以癸巳舉人官廣東佛山同知國變去官侍親津步終日在側一舉一動靡不扶護必至歸寢乃退性好鐘鼎文及小篆家刻祖庭子苾閣學據古錄金文九卷全出手樵案上置說文一帙學誦仿奉親外從不輟業此鈺同辟地時所親見六七年如一日也侍郎考終後苦塊中日形毀瘠甫祥而卒不以孝名而孝行獨至古所謂視無形聽無聲者庶幾近之為先師貴筑黃子壽方伯孫女壻身後無傳志特敘其略以志名父之子學行之可欽尙者如此乙亥十二月北池寓齋記

海豐吳撫部墓志銘并序

公諱重熹字仲樸晚號石蓮海豐吳氏先世自康熙初進士特獎忠貞少參公後六傳至閣學子苾先生均以科第進身敷歷中外載國史及名家傳志烏奕顯融不待複述公卽閣學公仲子也母一品封劉氏直隸高陽例貢生江蘇裏河縣丞諱環公女生而至性過人自總角卽隨兄鏡秋先生飫聞庭訓於乾嘉諸老輩實事求是學派旁及藝事靡不覃思邁進而本原之地一以綱常倫理爲歸年二十五舉本省鄉試報捐郎中籤分工部以歷辦 穆廟山陵諸大事外擢知府守陳州者十年守開封者八年鄭州決口滎澤縣民工出險赴工次搶護不避淫霖酷日以身先之於興學聽訟緝匪振荒諸要政則督率屬縣務使實惠及民兩郡父老至今謳誦循績上聞中樞倚重歷階至開府蓋由於此計兩

權開歸陳許道一權南汝光道擢江安督糧道署江蘇布政使調淮揚海道時值庚子之變奉江督劉忠誠公檄赴西安行在呈進方物入覲東朝備蒙優錫還任後擢福建按察使未幾又擢江甯布政使調直隸未受事拜護理直隸總督恩命甫履本任特旨以侍郎候補充會辦電政大臣駐滬上者四年召補倉場侍郎會萍鄉匪亂出撫江西事救平召轉郵傳部侍郎歲餘特簡河南巡撫福公司煤礦交涉損國家利權至鉅公力持正議與外務部所主張者差池無何罷鎮之命下公遂慨然於直道難行無意問天下事矣辛亥變作避地天津諸子亦先後辭官來侍膝下公自童丱至耄歲未嘗頃刻廢書於先古遺文尤寶護如頭目既刊吳氏世德錄吳氏文存吳氏詩存攔古錄金文閣部公日記等書又刻大清律例通考九金人集山左人詞等書津逮甚廣杜門以後又理董閣部遺著金石彙目分編以六卷未竣引爲大疚自著石蓮閣詩十卷詞一卷皆定稿刊行他所撰述及官書奏議則排比成帙藏於家獨居深念則以爲奕世穹官及身乃逢奇變涓埃無補有負平生又以道揆法守一時崩潰江河日下有未知所終者用是沈憂極憤體益不支於夏正戊午年六月二十二日考終津寓上距生道光十八年二月

初七日壽八十有一配一品夫人陳氏協辦大學士吏部尙書濰縣文愨公孫女三品卿銜翰林院編修介祺女貴而能貧以不逮事翁姑所以禮兄公娒婦者敬愛兼至嘗割股和藥起公危疾躬操家政數十年人無閒言先公二十二年卒子四長嶽戊子科副貢浙江台州府同知次崧江安督糧道署兩淮鹽運使三幽癸巳科舉人廣東佛山廳同知四嶧廕生側室高宜人出女一南皮張彬其壻也孫保銛候選通判保錯候選郎中保銖禮部簿正保鎡保鏐保鈞孫女十一曾孫繼本濟本隆本曾孫女七卜於甲戌歲四月二十七日與陳夫人合葬邑東南鄉牛家莊新阡嗚呼鈺何人也乃不揣而志公墓也蓋自公解組而後鈺適奉調外務部京邸鄰近隨時請益推挹逾分有不敢承者同僑津步益不勝氣類之感酬唱問答僮走爲疲忽忽七八年習見公危坐斗室論議教誨三公子幽以習篆娛親不離跬步氣象淳古如游萬石君門下時項城袁氏柄國固公官陳州時識拔士也閒詢公比來對公云何公笑謂亦承其偶來存問耳未嘗覆以一字又謂諸子雖服官各省子叔疑故事我則恥之又自鈺遜國詔下後舊時失職大員不應具遺摺者往往率意上瀆邀易名之典公謂去官無遞遺摺例余以開缺人員將來尤不應上聞諂

諳爲後人預戒焉蓋公律已嚴正無一不秉禮度義大率類是曩聞公之長逝也馳往哭之時甫屬纊受哈諸子環跪於側次公子對遽以志墓文請且嗚咽曰此先人遺命也倉卒閒垂涕應之內亂頻仍今始告窆長公子欽乃理前諾以行狀抵舊都爲撮陳大要如此管蠡之見誠不足旣公盛美九京可作或不責其僭且誣也俯仰人天淚隨墨下銘曰聿有漢殿名靈光巋然高峙何堂堂翳公德望與頡頏痛哉老去遭海桑孤夢攀天天茫茫一柱難砥狂瀾狂人閒萬事付糝糠所期世學綿青箱賤子奉教逾十霜責以銘幽增悽惶一生無愧在倫常標此七字公能當無棣城古鬲津長首邱大願今其償喬木世臣於茲藏敬告終古毋摧傷

通州張侍郎墓志銘

并序

公諱翼字燕謀亦字彥謨順天通州張氏世居州之西鄉力田孝弟無升於朝者爲善無不報乃昌於公公雄特開朗得於天賦軀幹修七尺以上聲如洪鐘七歲喪父賴節母撫育成立髻齡卽善技擊平鄉里不平事有若成人孤貧失學及壯乃從前太常寺卿寶坻方華卿先生遊銳求正學慨然有志於天下遂由材武起家洊登卿貳爲賢王賢相倚重

光緒中葉後國家大政隨時左右其閒視以筆墨得官鈔所建樹者相去萬萬也初母夫  
人之教公也嚴產薄不足以活年十二卽督習負販事不少姑息旣通顯矣仍以禮繩公  
時見聲色公則起敬起孝一如在昔嘗命立義莊義倉振闔境偏災又因就養江南命修  
壽州城隍諸大工蒙 賞一品封典及樂善好施匾額非此母不生此子世兩賢之公之  
入官也實於十六歲投効神機營始營爲醕賢親王自統一顧賞公命以營員入邸供職  
敏慎出曹偶上日見親異時王領中樞合肥李文忠督直隸公嘗以廉藺故事進政局大  
和北洋設施如海軍海防外交路礦諸政王重其事每有垂詢輒指陳機要與贊其成甲  
午隨王校閱海軍於堅瑕之故考求尤備用是王倚公如指臂賢能之譽洊達中禁分在  
疏迹隱然儲心膂之寄庚子後又隨嗣王專使赴德國德皇以戕使之故將以禮節辱專  
使公護嗣王止邊境不入彼知中國有人不可侮也卒成禮而歸蓋公光佐勛藩有關國  
故者如此公自入邸供職十餘年中洊升屢陟至癸未始以道員發江蘇旋調直隸歷保  
軍機處存記二品頂戴戊戌 特旨以四品京堂候補幫辦關內外鐵路事己亥授內閣  
侍讀學士辛丑加侍郎銜充赴德專使參贊官復以隨辦和議功擢內閣學士未幾 特



恩以侍郎候補幫辦路礦事宜。賞頭品頂戴改幫辦爲總辦。歷署禮部工部右侍郎。以開平礦務被參革職。甲辰以往英國對質。予三品頂戴。訟直歸國。命以道員發北洋差遣。宣統改元復荷。特恩以三品京堂用。並賞還頭品頂戴。則公所歷官也。公曠觀時局。謂非從事實業。不足以救貧弱。用究心地。官廿人之學。壹意提倡。如熱河承平銀礦。建平金礦。直隸永平金礦。唐山洋灰公司。山東嶧縣煤礦等。皆首入鉅貲。衆商踊躍附股。遂得各樹一幟。先後淳興而其董督最久。波折亦最多者。莫如開平礦務一事。開平爲唐山煤井產富。聞中外以絀於貲。事多不舉。原辦粵人唐某等服公才望。且入貲多。公推公爲總辦。公既蒞事。百廢皆振。庚子拳匪亂作。各國以報復之師。掠官商營業。而開平則俄人據之。公圖保全策。畀會辦德人德瑾琳代理全權。德瑾琳以此礦本有外股。定中外合辦章程十九條。改爲新公司。公既允行之。德瑾琳乃據此與俄人交涉。冀得索還。當訂有移交約及副約各一件。移交約者由舊局移交新公司。副約者載明華官督辦。所以鈐制移交約者也。簽訂明確。本無疑問。俄人因是承認此礦爲公司營業。軍以退出。事甫定。礦師英人胡華遽藉口與德瑾琳訂有私約。意在鯨吞。時北洋大臣某素嫉公。且涎礦利厚。遂

不問公之未簽私約故聳其詞以賣礦効公有 旨革公職並責令赴控英廷既抵英與胡華對質法庭駁辯十五次供詞厚六百餘葉旁聽者日以千計報章亦督過胡華英官乃判仍履行副約不者以全產屬華商於是公誣得白公之心亦瘁矣恭讀宣統二年十二月初五日 上諭有此礦經英公堂判爲誑騙無慮久假不歸之文是則此案顛末朝廷諒之海外證之載諸史乘亦可使後來者共信之也公始官南洋受知於湘陰左文襄湘鄉曾忠襄新甯劉忠誠諸帥泊官北洋尤爲李文忠倚任庚子變亟於京津中阻時募人由閒道馳書滿洲榮文忠具言拳匪不可縱衆怒不可犯痛陳利害爲所采納旋南迎李文忠全權使節於滬上和議得成多所贊畫壽州孫文正又重公留心理學納交者有年諸公皆一代人望周旋有年穆若笙磬彼苞藏野心者獨借端而傾陷之益可見公之忠於爲國不徒以幹濟見知千秋論定夫亦可以無憾矣公來自田閒敝衣糲食終身不改歷主賑務活人不可算提倡諸實業利賴至今待人有大度爲所識拔者後或不利於公一笑置之辛亥以後避地天津痛心國變疽發於背治得愈旋以憂瘁不起臨絕惟以受國厚恩毫無補救爲恨命以杉棺布衲斂亦可哀矣生道光□□年□月□□日卒

□□年□月□□日壽□十有□曾祖諱登舉祖諱存禮父諱玉瑛曾祖母氏□祖母氏□母氏楊皆贈封一品三娶皆通州王氏無出繼夫人李氏同州太學生諱鴻來公女再繼穆夫人滿洲前開歸陳許道諱□□公女子皆李夫人出未名者二與三文藻均殤文祁某官娶某氏文孚某官娶某氏女適建德周愨慎公七子廣東候補道學淵文孚子長懋鵬次某某先於□□年□月□□日葬公州境都閣莊文孚字叔誠不鄙銜頑鈍設梟比屬爲懋鵬授經今三年矣以公志墓之文委重禮辭不獲乃最錄其大者如上銜適館以來得見堂宇之間宸章稠疊又備聞穆夫人來歸實由榮文忠仰承中旨爲之作合公旣被議而眷睽弗替從知公之見賞於先朝者固軼乎恆等也不勝人亡邦殄之感太息而銘之詞曰

越在草莽崛起者艱或起或否有人有天赫矣張公莫爲之先雲揚森舉云何致然惟公行義曰篤本源惟公才地曰邁時賢忍辱負重靡易靡難爰躋朝列異數蟬嫣發揚樂利奔走危顛含沙或射抱璞終完古來豪傑舉出單寒蒼蒼不負君子信焉眞宰上訴閱今有年龍亡虎逝有責誰肩人貴自立先哲箴言護此靈宅芝草醴泉

翰林院侍讀嘉興錢公墓志銘并序

嘉興錢氏稱名閥者夙矣至文端公以國老冠冕東南再傳爲甘泉先生以樸學繩之先生生恭勤公則始佐曾湘鄉幕府榮問洊上入贊中樞於光緒朝局多所匡濟爲之後者迪前光也難際桑海之交而復以名節著聞克保世臣家聲則難之又難此鉅所以心折於侍讀公而欲稱述其萬一者也公諱駿祥字新甫晚號瓚叟世系備詳先世傳志及恭勤公傳志恭勤公子五公其仲也爲恭勤公元配許夫人出時甘泉先生司訓海昌鐸署高閒以課孫爲樂未十歲卽畢諸經後侍恭勤公江甯得聞諸老緒論器識日高未冠入邑庠旋食廩餼困於秋賦歷優貢副貢至乙酉始捷北闈己丑成進士改庶常年四十有二矣庚寅散館授檢討甲午 簡山西學政三晉士風樸僿一以振興實學自任廣購羣籍創辦學社以開風氣選拔屆期必覘學識核年資而衷以文藝釐定口外七廳學額劑平杜濫奏請允行試絳州遭時疾校試如程免就試者延滯蓋由久阨場屋於寒峻生活知之最稔也報滿還朝歷充會典館纂脩國史館纂脩編書處總校文淵閣校理及教習庶吉士日講官起居注諸差越次擢撰文晉侍講轉侍讀敘勞加二品銜宣統元年 特

派實錄館總纂感念 先朝恩遇趨事益勤 遜位詔下糾合同官誓不輟筆歷六年書成 賞花翎頭品頂戴後又拜匾額朝馬之 賜此公歷官任事之大要也公先以貲郎分兵部坐曹者十年時恭勤公方荷中朝倚任萬流仰鏡公一意斂退無貴介子弟氣習京曹以陵差爲階榮捷徑會同鄉徐忠愍屬任其事辭不就人皆訝之有廉其故者以先有同官浼公道地於忠愍以堂屬分嚴拒之拒人而已預焉於義云何然亦未嘗以自白也生平嚴於律己大率類是孝事恭勤公以勤官勵品爲養志之本髫年失恃事繼母程夫人必敬必順以爲悅親之方莫大乎視異母弟如同母同甘共苦老而益篤推之羣從兄弟友愛若一三黨諸親與先世舊交力所能及靡不援助家法重祭祀暮年起跪少艱從未廢禮戀闕僑津欲歸不得閒歲必旋里徧謁祠墓癸亥春自南北返遭臨城夜半劫車之禍匪挾以行卒以年邁顛仆捨去或以盛德之報慰公公慨然謂行將就木得拜先隴爲幸卽罹意外亦無懟焉蓋公篤於本原之地又大率類是其爲學也以實事求是爲歸承撰官書皆謹嚴有法少年卽以詩古文詞爲李廷尉聯琇薛太守時雨諸老所賞均付散佚存有晉軺子吟微塵餘光等小集亦未嘗示人伯祖衍石先生輯有錢氏世譜一

書久未廢續中更兵燹措手尤艱公四出搜訪踵前例成書以宣統辛亥爲斷爲公近十餘年精力所萃云元聘許夫人配周夫人歸安兵部主事學洙女弱公一歲與公同德嘗刲臂起公危疾丁卯歲花燭周甲屆期縉紳慶羨今歲庚午二月卒津寓公手撰行略并悼亡詩三十二首詳述嫺行讀者因以增伉儷之重公以感傷成疾錦孫等奉公入舊都百方調護日益危篤四月戊午日屆巳考終子舍正寢上距生道光戊申四月己巳壽八十有三子長錦孫前癸卯舉人度支部員外郎歷任鹽務署廳長財政部總務廳長署財政次長全國菸酒事務署長次者孫前增貢生郵傳部主事財政部薦任職任用三瀛孫增貢生分省知州前卒女四次未字卒潘肇翰陳方鏞沈文孫其壻也孫六慎曾慎詒念傳卒鑫淦鑒均入校肄業孫女六鉅自辛亥以後同僑津上私見公一腔忠愛無以自將每涉時事輒亂以他語無聊歲月借寫經爲常課日昃必登市樓啜茗二三舊雨默焉相對餅師茶豎不知爲舊朝紳也以視夫託名棲隱日縱其聲色酣豢之欲與夫乘時趨利以封殖自雄者其品格之相懸爲何如嗚呼公誠遺逸之正軌而吾徒所當引以爲法者也來歲辛未二月錦孫等將奉公與夫人之喪返葬邑之萬蒼山祖塋奉狀乞銘爲草鉅

之所敢言者以完後死之責銘曰

巋然一老今儒宗者英者學嗟誰同一屈錫羨一飾終世臣論定叨九重強飲強食春復冬有不入耳託爲聾一十九年甘羈窮忍淚看天天夢夢生際唐虞香樹翁霄漢許躡松喬蹤公也顧之付飄蓬但幸入地無赧容避秦哀郢相炬叩千秋文字慚吳蒙弔遺獻者此其封森森宰木號悲風

分部郎中吳縣陳君墓志銘并序

君諱宗浩字益勤號養泉先世籍宣城明建文朝有諱景道者以官禮部殉國難幼子匿他所傳至諱通者始隱居吳下故爲吳縣人九傳至充然則君曾祖也本生祖垠祖垣父傳鉞世修內行惠及里鄰以故閭門內陳氏稱名族焉君少失乾蔭賴母趙太淑人撫養成立以珠業爲先世所貽家貧輟學游闔閩間以勤慎敏練聞會粵逆陷會垣奉母避蕩口鎮母以驚瘁卒旣渴葬間道馳上海理故業益自刻苦爲諸老輩信任先後主裕和德昌店事光緒初元始自設信昌一號推廣銷路及歐美各國二十年間營業大振家境日裕用是利濟之事自親及疏自近及遠靡所不爲其大者首仿古族葬法購地獅山之麓

名曰穎川族葬所旋與同宗合建義莊於黃鸞坊橋衙置田千畝規制仿高平范氏獨捐銀三萬餘兩中附家塾經費則另以鉅金濟之旅滬既久念鄉人殯厝無地糾合義故創建平江公所築屋百餘椽以容之存歿交便又定代運法俾正首邱施助棺木及醫藥衣米等善舉均附設所中章程完美足供遵守從前航海病歿者輒被管駕西人拋置海中飽魚腹君又助成平安堂商諸輪船公司隨船捐備太平棺二具俾免水葬之慘各省水旱災歎既樂予施助更自出經費就寓設籌賑所廣爲勸募代爲收解經大府奏陳兩邀特旨嘉獎並賞給樂善好施四字匾額蓋君賦性慈惠力足舉之凡所建置法備利宏如此逮光緒季年珠業之運銷外洋者忽報停滯號中積欠莊款至數十萬之鉅君以甯人負我毋我負人自矢罄所有償之用是家境驟落顧於義莊公所諸要舉仍盡力維持不以豐嗇易轍尤爲人人所難由監生議敘主事分部郎中賞花翎三品封典娶於錢封淑人生女殤側室孫生子維琳亦早殤以從弟子維格爲後生道光二十三年二月十五日歿於夏正壬戌年十月十六日壽正八十錕與君從弟孺萊明經從子伯材太守雅故嘗薄游滬上晤君恂儒素不類富商大賈言及民生之顛連困苦一若重有憂者



鄉人士誦君義行則劃然出一口重君已卅餘年君今往矣獨謂君所經營締構者苟一日存在則君之名一日不泯視夫封殖自恣歿而與秋草同盡者其得失爲何如也歲丙寅某月某日維格將奉君棺葬某山先期草事略請銘民生日艱善人不作用列大要以風當今銘曰

陶朱致產復散盡惇史書爲天下準藹藹陳君起寒窘滂仁曠義相錯紵敬宗收族誠且允旁施於鄉無哇吟封事上聞出大尹 天言褒寵震聾蠢多牛足穀擲虛牝厚亡徒供有識哂曷若良心推不忍身雖隕兮名不隕太邱陰德高嶷嶷懿惟君也勿替引我最其行書貞筭瓦千萬禩式來軫

候選知府青縣甯君墓志銘并序

君諱世福字星普直隸青縣甯氏族居大興口累世力田及君而門戶始大生五歲喪父母胡苦節撫之得以成立產薄不足活數口乃謀食於市勞辱之事靡所不爲獨以誠篤有能挺出儕伍中天津爲北中商賈總匯直魯豫各商以事任君無不集年三十五爲某莊主識拔以襄理屬之營業銳進時英人維利參所設新泰興洋行方不支耳君幹練名

延主行務君與中表某君內外分理百廢皆振歷二十餘年無中外皆多之光緒二十六年拳匪造亂以排外號召黨徒借津埠爲窟穴各國聯悍隊東駛將屠津民泄憤君得其耗集紳耆籌弭禍法流離奔迸鮮有應者久之始議舉三人往謁英水師提督西茂請求罷兵而推君爲先導既定期二人又瑟縮不面事益亟乃挺身獨前時駐津洋兵佔守城南以人爲的見卽斃之君繞道潛行得抵租界予無可爲計適英人德璀琳躍馬過以素識故泣請介見英將時英將氣張甚以戕公使殺教民官不之禁又礮轟租界爲責言唯盱叱咤非一縱兵勢不可君入甫出數語以足蹴君幾仆君不爲之懾益忼慨陳詞謂釀成國際交涉自有任其責者於地方良善何與縷縷數百言英將亦爲動容然終不允所請也君已無可柰何乃仰天呼曰我冒死而來不得請則何以見津父老一命固非所恤正搶攘間德璀琳亦與爲疏解英將卒感其誠允照公法從事且握手爲別未幾聯軍逼津郡得免焚殺君之力也方匪焰之熾也津屬土著激於積憤嫉信教者多所不利和局開議地方教案均歸地方議結天津道張蓮芬重君肝膽可倚以調解事任君君又會同七邑紳耆與神父雷某交涉索賠款索償命汹汹已甚君始終以持平爲請奔走累月

筆舌俱敝卒以定議用是津屬之得全其身家者不可數計事竣合華洋士商以中外咸  
欽四字額其閭蓋弭兵之請功在郡城教案得平則功在七邑又如此鉅嘗就津人所輯  
襄理軍務紀略一書讀之以爲咸豐戊午英法之役軍鋒非專指天津餽牽之供差足紓  
禍若庚子拳亂則在彼爲報復之師悉銳而來務肆其毒君獨出身犯難得挽赤地之慘  
劇是則見理既正趨義尤難百年閒地方大事知必有人論定之者君自是名振朝野某  
邸待之如布衣交西人來訪有名華商亦最君生平播告各國君則謂人生一世本爲辦  
事而來曾不以自喜也君篤於本根之誼推宅置田合族有賴地方善舉概肩任之乙未  
旱災丁巳水災既倡捐鉅款且命子親蒞其事領袖商會事有年於市面則力顧大局多  
被其惠其他義行甚備以非君千秋所繫故不書累膺獎擢官至花翎三品銜候選知府  
特賞一品封典曾祖父居治曾祖母氏李祖父祥祖母氏牛氏鄧父大林母氏李氏胡  
均贈一品胡以守節三十年 欽旌節孝娶于氏與君同德先君十六年卒子二長奎章  
花翎法部郎中候選道次繡章未仕女二靜海趙□□同邑王□□其壻也孫五春霖春  
祺春濤春銓春榮曾孫十生道光壬寅正月初八日卒夏正乙丑四月十九日壽八十有

四以□年□月□日與于夫人合葬於邑之□原君奮跡孤寒造福宏大信今傳後於  
法宜銘銘曰

貨殖之學仁勇智強史遷有述兼者爲良翬翬甯君鍾毓瀛滄節母有子前沈後揚其強  
維何崛起窮鄉其智維何回易重洋中際大劫慨以身當命擲螻蟻誠動虎狼甯武匡衛  
宣聖所臧仁必有勇百世相望既推國耆亦衍家祥惠誠定謚報以馨香不儒而俠高步  
超常善徵天與邦痛人亡津橋旅寄咫尺靈光不慚一字用詔茫茫

壺關縣知縣天津劉君墓志銘并序

君諱鳳翰字藝林別字笙樵天津劉氏先代遷自靜海至君凡八世曾祖國相妣張氏祖  
和中妣楊氏張氏父景夔妣閻氏累葉皆潛德弗耀矜式鄉邑以君貴皆贈四品繼妣蕭  
氏封太恭人以節孝旌君生三日失恃四歲失怙終鮮兄弟家道中落襁褓時體弱多疾  
實蕭太恭人拮据恩勤得以成立感夫門戶之寄奮自孤童連掇科第又少長窳衡熟知  
民間疾苦泊令晉省值拳教搆釁而後因應綦艱赤手衛民台司折服國論日變遂奉親  
返里得完其志事以終此固數畿南遺獻者不應蓋闕者也君年十七入縣學以廩生舉

光緒己丑恩科順天鄉試甲午恩科會試成進士用知縣發山西歷署太谷嵐縣陽高等缺補授壺關縣本任外先後兼絀長子長治兩縣篆其在陽高也民教懸案既與教士力爭一清塵牘東鄉崔姓者弟以入教爲拳匪所戕善後卹款教士迫乃兄繼弟入教具領又以兄女受非教民之聘脅以毀盟且匿閉教堂女絕食三日不之顧君廉其實提案庭訊得女挾匕首誓死狀憫之令入內衙善言慰喻而督原聘壻卽日假旅舍成婚一時頌聲載路教士則恫喝計窮以強項令日君卒亦無如何也任壺關先後四年縣與汴西接壤游匪出沒不常防營兵少不足鎮壓自募壯丁四十名以新式槍法教練四出巡緝轄境得靖嘗弋獲十虎會匪素以姦掠著者巨魁凡十二人將置重典適調省會審要案爲權篆者縱去引爲大恨時方以興學爲地方官考成計推廣高校釐定學區添設鄉校遣送游學悉中部定規程其他廣積穀設民團因地因時不務赫赫名而縣以大治蓋君抗志循良以實心實力自矢任久然任暫亦莫不然又以善折獄名鄰封難結之案輒奉檄鞠治情罪失當則侃侃陳所見不少回屈上臺鑒其誠不深責也平居盱衡時局喟然謂變法以後百里之任益不易勝偏親又年老思鄉遂捐升同知呈請終養回籍時光緒三

十四年秋也越九年蕭太恭人棄養君年已六十有一感念慈恩哀溢於禮泊服闋則國體之更久矣時風衆勢格不相中積憤有年遂以不起於夏正壬申年八月十九日考終里第上距生成豐乙卯年八月二十七日春秋七十有八元配于恭人結褵未幾卒繼配暴恭人有淑行所以主內政者甚備先君七年卒子二長良珣候選府經歷後君卒士珍山西候補縣丞女一適靜海朱氏孫五亦向學向師向述向又向曾孫式曾歲甲戌某月日葬邑之某原兩夫人祔焉鉦自宣統辛亥後僑津郊者二十年幸不爲邦人士鄙棄忝與君同鄉舉獨未一謀面焉比者士珍奉狀乞銘得諗君行義大槩乃追悔於奉教之先也愴然命筆以詔方來銘曰

出以福其民歸以頤其親始既委贄而爲臣終不枉道以從人允矣得君子儒之真皎志節以長新奠此幽窀千秋萬春

元和顧隱君墓志銘并序

鉦與鶴逸顧君同里同庚以名志相好者數十年宣統辛亥後鉦漂泊北中三次返里輒握手苦語不忍遽別私擬少完塵累從君爲物外之遊君竟先我逝矣執筆志君墓萬感

紛來蓋幾幾不能舉其詞也君諱麟士字諤一號鶴逸自署西津或署筠鄰元和顧氏先世詳馮中允桂芬王樞部頌蔚撰兩代墓志父諱承晚號樂全子四君其第三子也祖庭良菴先生以文章經濟爲道光後吾吳泰斗厥考繩之尤以善怡其親聞君體幹秀偉妙於語言秉不世出之天資上綿家學鴻雅爲同輩推服中年以後昆季多物故者家政集於一身於人世情僞更無所不習綜覈一生盡理盡倫殆無虧缺晚遭海桑之際時風衆勢格不相中門戶之負荷至重大懼及身而墮之拮据搢拄歷有年所大命既訖則歸觀先人冀告無罪回曲隱軫之志事誰則喻之宜乎海內談者僅僅以畫名屬君也君未冠一應童子試見有老學跪請易所污卷者堂上厲呵之兩鄙所爲遂謝舉業天性於畫學爲近髻齡隨長者自鄉祭埽歸卽屏坐空齋揣寫所見樂全翁故善六法濡染也早過雲樓藏名蹟至富稍長益取徑明賢上規宋元又兼綜於國初六家寢饋以之自成高格光緒中葉怡園爲勝流所集月開畫社羣推君執牛耳旣傾乾蔭孝事母朱太君不忍遠離以煙墨娛親至踰艾齒感夫昔人行萬里以恢畫境之說特構崇臺望雲物以資變化負郭佳山水靡不蒐討尤矜異天池一峯有趙寒山券隱之志性情所寄清夔軼俗平日持

論於神妙能逸四品之外特標仙品一目仰屋茹毫心焉赴之以故天人並到翕然衆口走書幣乞請者遠及海東聰明日力消耗其中晚歲亦復告倦而無以謝絕天挺雅才遂爲有清一代藝苑傳人之殿非一人之私言也世以鑒賞名家踵門如市君矯時俗重畫輕書之習凡先哲翰墨尤所甄采又好版本之學宋元舊槧及老輩遺著悉懸金求之蓋善承先緒而旨趣益遠矣其待人也一技之長必予獎借我館我殯視爲當然恥爲標榜之行或諷君作汗漫遊爲收名計者一笑謝之當世風日下之秋而獨敦古處大率類此於方劑營造種蒔雕刻諸藝均具神解則君之餘事也生長鐵瓶里第垂老避囂居城西別墅旋得中風證東人有越海來問疾者殮殍半年遂以不起遺命以僧服道人鞵斂志署隱君字者體君志也生同治乙丑六月庚戌卒今夏正庚午四月丁卯壽六十有六元配氏謝繼配氏潘女有士行三黨賢之子五長則明殤次則久三則揚五則奐第四子則堅傳君畫學先君一年卒女四長殤次適李文錦三適陸欽寶四殤孫九孫女十著有因庵石墨記未成成者續過雲樓書畫記鶴廬畫識鶴廬畫趣三種藏古印尤夥輯甄印閣印譜均待刊刊行者爲鶴廬集帖若干卷來歲辛未二月則久等將葬君西津橋生壙



郵狀乞銘銘初聞君喪卽草一誄哭之傷心之故不忍再述特揭君生平大要書諸貞石後有續蘇賢小記者庶有考焉銘曰

玉山風流今云徂平抗心希古君其徒乎俟齋不寐光我吳乎蘭薰雪白德豈孤乎荒荒舊夢其唐虞乎衆人不識列仙儒乎鶴乎鶴乎邀清都乎九京可作吾言誣乎嗚呼

吳縣顧君墓志銘并序

年家顧子起潛修業燕京大學時過余織女橋憫舍討論金石文字及鄉邦掌故至相得也夏初歸省訂入秋復來未幾聞侍父疾又未幾聞遭父喪余以起潛得盡人子大事馳書唁之無何郵狀請志父墓詞甚迫日月有時不忍稽也按狀君諱元昌字竹盦別號冰谷吳中顧氏奕世名門三代詳封中憲諱祖慶公志文中憲四子君行居二出嗣叔父諱烜慶公後君生有至性以不逮事嗣考妣所以事本生者不懈益虔嘗侍中憲公偏中疾不避勞穢歷寒暑十有四月既棄養不忍以服降仍執喪三年又當伯兄病篤猶子皆幼率介弟主持醫藥喪葬等事耗竭心力孝友爲人生大端於天屬之愛肫篤至此世所難也少應郡縣試屢冠其曹卒無所遇遂由國史館謄錄議敘通判發安徽補用歷充要差

勤慎爲臺司所知會鼎革謝歸吾郡有商務總會君主文牘事歷二十餘年理紛劑平有裨闡闡閒者至大嘗以工潮被侮置之不校先後充市議會董事農會評議員志局采訪員國務院咨議隨事建白多所匡益髫年卽潛心八法羅漢松室書課爲老輩嘉賞後又融會諸大家迄晚歲弗替得者謂可接迹南雅耕石諸宗老鄉里後生經指授者尤衆又喜鈔校羣籍首尾精整充溢樞櫝嘗訪得宋紹定井闌鑿顧銜復泉四字卽以署其齋一時傳爲佳話家風儒素儉於自奉而博於所施數十年如一日也以肝膽疾劇於夏正癸酉年八月十八日考終鯉溪新宅上距生清光緒二年七月初十日春秋五十有八初聘紹興高氏元配元和王氏有淑行具別志繼硤石許氏卒又繼陳墓王氏子四廷瑩殤次廷龍卽字起潛者得文學碩士學位三廷鳳卒業交通大學其四君卒後一月生遺命名廷鶴女二一適川沙黃燾培一幼孫誦詩誦芬卜於卒年十二月初五日葬福壽山自定壙穴諸夫人祔焉余與君從子廷貢同鄉舉得登安時堂者忽忽逾四十載起潛追念舊交一敦古處有父乃有子用以見君之學足以闡後君之行足以型家宗模鄉望不忝前人矣最錄大要庶幾千古銘曰

故家遺俗今泯芬秀野名胄卓不羣事親從兄質有文游宦不達安榆粉平生雪白兼蘭  
薰歿祭於社古所云苟陳門風我習聞敢告樵牧護此墳

吳縣管先生陳太君合葬志銘并序

夏正癸酉甲戌之交世丈管衡甫先生與德配先後作古鉅既各撰一文郵喪次輓之合  
葬有日嗣子洪復以銘墓爲請交誼夙矣鉅又慣述老輩行誼以風當世者於是敬諾不  
敢辭先生諱禮秉字衡甫吳縣管氏曾祖諱邦昌妣氏程祖諱瀛妣氏陳考諱遵模字稼  
軒妣氏潘累世皆潛德弗耀矜式一鄉龍潭管氏爲吾吳名族巍科碩學蟬聯弗絕先生  
本支則營網業者有年昆弟三人行居其季成童時奉父稼軒公命出爲邵氏後邵安溪  
翁與稼軒公交至篤粵逆陷蘇垣邵氏全家被難獨安溪翁挈一妹一女甥得脫夙撫先  
生如子姓故乞爲嗣先生故少承邵姓後以門祚寡薄奉母命兼承兩姓失怙後仍入肆  
習世業以勤懇篤實稱少暇卽從事測績新法旣成應安徽輿圖局之招上游賞其能積  
資可博一末秩無何遭母憂解去移家上海主各廠肆會計事浮沈有年境少窘矣會子  
洪以營運有獲家道漸昌齒德旣尊羣以長者禮之年七十手輯吳縣管氏家譜二卷刊

行又重建曾祖妣祖妣兩代節孝坊重修祥符寺巷家祠先後落成爲生平志事之大者  
其他推解友朋任郵族黨振濟各行省旱澇兵災諸善舉請無不應知無不爲待所嗣邵  
氏妹吳及女甥唐如一家憐其皆無後也爲立嗣爲授室爲置產俾兩家香火有繼此尤  
薄俗所難也太君陳氏出同邑名門少嫺閨教弱先生者六齡來歸後佐君姑家政能得  
歡心君姑棄養適先生客皖不及奔赴卽盡斥奩飾治辦一切中禮吳下繡工有名於時  
太君以鍼神稱晝操井白夜親燈火用津濟家用紓良人內顧憂耐勞習苦不以境之豐  
嗇有異與先生同德同心同臻大耋同修淨業甫逾旬同棄人世爲梁孟爲劉樊屈指郡  
邑中不數見也先生於癸酉年十二月十八日考終滬寓上距生成豐辛亥年二月初七  
日壽八十有三太君繼逝於甲戌正月初一日上距生成豐丁巳年九月二十四日壽七  
十有八長子洪承祖遺命仍用兩姓援例敘官花翎三品銜候選同知屢游歐美各國爲  
商業中健者娶潘氏次子激瀆女二包鈞尹廷傑其壻也孫六明義乾義崇義賡義學義  
行四者熊義以不幸歿孫女一曾孫紹盈卜以乙亥年四月十五日返葬邑之梅灣村萬  
青字圩之原午山子向洪字復初少受業於先外舅仁和胡馥堂先生兄事鉅者甚備蓋

援爲羣拜紀之禮者四十餘年矣甲子二月由天津薄游至滬先生邀登市樓聽彈詞盡  
購吳下春初諸小食款之既傳餐列肆太君又手治鄉蔬多種以慰客子時鉦年六十如  
理卯角時舊夢私以爲此國變後一樂事也忽忽十年赴書遞至吁可傷矣猶幸佳城所  
在與鉦歸骨地毗連觀乎九原老成未遠歎仰之餘爲撮述大要以完後死者之責鄉人  
士有數管家園世德者則二老人之行誼爲可法也銘曰

夫夫婦婦家道正煜煜典訓古三聖百年庸言兼庸行天亦右之鍾福慶王迹既熄邪說  
作治外治內紛舛錯安得長者式澆薄如斗建杓衢振鐸四維說由齊相管遐哉茂緒到  
今纘大德大年世所罕木公金母人天伴原氏阡鄰京兆阡胥山蔥鬱胥水漣玉棺雙窆  
仙乎仙有考德者視此鐫

仁和陸母吳太君墓志銘

并序

鉦自辛亥以後恫夫人心陷溺古昔師儒之教不足以起人之尊信私謂人自有生而後  
母爲最親設於屬毛離裏之時得漸漬於聖善或不至爲時風衆勢之所劫得以葆其初  
嘗欲舉吾生親見數賢母撰記一二留爲世法故凡同好之稱述懿美乞爲志傳者雖不

文不敢以辭仁和陸氏吳太君則同歲生勉儕之母也光緒季葉就養蘇垣錕以年家子禮進謁親見勉儕告面溫清有孺子之容時錕亦奉親在籍每見必互問堂上起居引爲私慶蓋忽忽乎一星終矣歲之三月勉儕以母喪來赴述哀之啟則備陳母氏之所以訓勵之保愛之者與吾母之待不肖十九都同心瞿目瞿不能己已辱以銘幽之文相屬乃齋肅而書之按狀太君仁和吳氏自幼知書明大義未笄卽佐母治家事尊公與君舅本道義交嘉贈公子鴻先生英年秀出文行有聞謂陸氏世有隱德必昌其後目前豐齋非所計遂以太君字焉咸豐辛酉髮逆再陷杭城君舅不屈於賊被戕荒廟贈公誓欲殉父鄉父老以宗祧攸託督以大義乃閒關以達於滬久之就甥館焉太君旣以不逮事舅姑引爲不幸言復邦族一意佐夫成家食貧居賤不以爲懟既有子矣益不辭勞辱導以義方贈公用是得專挈正學心體而躬踐之制舉之文華實並茂從游踵至推爲大師同治庚午中副舉後累薦不遇未嘗以得失介懷則太君左右之力也會垣宗文義塾以培植寒峻有名贈公以誠篤明練爲老輩所器延主其事七年之中耐煩持要屏絕旁鶩同人感奮成就益宏光緒丁丑六月遽捐館舍事出不意太君惟質服飾以佐斂塾款儲於家

者千三百餘金立命所司持以去數如其簿印識宛然總理金君少伯歎曰一介不苟人情所難陸母於倉卒時尙然安能於尋常巾幗中求之蓋太君遇事廉辨類如此其尤著者太君既喪所天謂門戶大計莫先教子時長子年十四次僅十齡耳爲具脩脯擇良師夜則篝燈自課之吟誦聲與刀尺聲相和綢繆拮据心力益瘁嘗舉前賢之孤童崛起可爲師法者以相策勵勉儕兄弟亦聽受惟謹駸駸有二陸之譽辛巳以後二子先後游於庠以館穀贍家家稍以給太君則謂妄求而侈用不若節用而寡求甯自刻苦毋負債累刻苦雖粗糲亦甘債累則寤寐不適一時傳爲名言甲午夏長子盛年不祿太君以新悲觸舊痛幾不自支勉儕曲爲慰藉幸獲無恙勉儕既授館職以不忍遠離膝下改官江蘇板輿所莅必舉民生疾苦爲勉儕肫切言之勉儕亦遂當官而行不復役役於榮利本太君教也國變之頃僑居滬濱時局少定乃返故鄉以老疾終於里第生平不佞佛臨歿則謂有人來迎殆去來了然者歟時夏正丁巳閏二月十四日也生道光戊戌六月二十七日壽正八十以子階封一品太夫人子二長佐勳辛卯科副貢次卽勉儕名懋勳戊戌進士選庶吉士散館授編修保送知府分發江蘇署常州府知府以在籍辦學有勞奏保

道員加二品銜簡授江蘇檢察廳廳長女一適同邑陳漢第孫三曾孫二以某年月日合葬於贈公之墓嗚呼太君母德備矣於劉中壘所傳賢明貞順者皆允蹈之矣鉅獨謂太君之臨財不苟與所以訓其子者爲尤難何也自士夫不知儉德之可尙操守之間遂多遺議既成爲風尙矣甚且舉天憲民彝之萬難假借者一惟視利之所在與爲轉移瀾倒鼎沸釀成劫運誠如太君之用心處事夫安至生民之禍如此其極哉此所以撫時長喟而目爲夔不可及也爰揭其大作爲銘曰

聿稽坤德曰嗇曰均嗇以律已均以澤人遵此道者親親仁民反斯道者必殄彝倫懿歟太君洞見道真是義非義辨之斷斷吁嗟今世冒利忘身洪水猛獸茫無涯津世變亟矣常德自新元氣一綫或回陽春南山有蔚西湖不塵後有來者式此幽窀

吳江柳先生墓表

夫陰霾總至則清風以蕩之頽瀾不歸則巨防以砥之越在道喪文敝之會神徂聖伏之交實賴一二耆碩圭臬其閒至於攀侍靡由則表德之事昉焉披猖季運伯喈發感於陳碑葆練道真光祿寓懷於陶詠標盛昭鴻奄有前烈曾曾小子其曷以辭先生諱兆薰字



詠南號蒔庵姓柳氏吳江人也子厚文宗公權家法著在往牒烏奕光融曾祖學洙祖琇  
父樹芎並皆棲神九元屏跡三惑姓氏入耆舊之傳行詣補止足之篇菰蘆可戀謝慙卿  
慙長之嘲竹素相傳甚得筆得文之雅先生承重光累徵之後有懷文抱質之思不淆千  
頃之陂兼備四時之氣莊莊閱世翬翬窮年几席榜其箴言闔門肅於朝典君陳穆行庶  
幾施政之資胡質清標每有恐知之想蓋其門內之行爲不可及矣溯夫墜鈴之始卽遭  
緘扇之悲我生不辰無母何恃先生負牆庭誥捧杖家林大師則安定分齋執友則公榮  
入座蘆衣之感免動乎閔騫蘭膳之詩能廣乎束皙迨乎淫潦不害嘆孝卿之奉喪春社  
方修爲叔治而罷飲孝乎惟孝古人所難激薄淳澆於是乎遠咸豐季年粵逆東竄河決  
魚爛難壅難全先生所居則邑之大勝港也鷗天萬頃蝸國一隅世外桃源足逃塵劫而  
乃儀毀家紓難之風行句卒搏力之法高平儒服奇兵羅於胸中士稚雅才義徒列於幕  
下相翔奪氣劫質斂蹤乃心公家實見利器少習墨義有志雲霄先正明清波瀾莫二李  
愔得雋村題秀才之名潘乾效能碑署校官之目丁卯省闈文已及格一發不中誤落副  
車清嚴鳳沼空題荀勖之名剝蝕鶴銘偶訪隱居之跡蓋自長君笠雲之亡而課孫翼後

之志決矣先生接人以柘與物爲春留名恥於豹皮嗜義方乎熊掌水庸可奠乃乘櫂以程功天災偶行爲捐田而續命鐫名賢之小集不待醵金振遠道之恆飢時聞汎粟若夫一本之閒用情尤竺聽雨雪懷兄之涕整冠修敬嫂之文婚祭有資公輔義田之記眷房自別明允族譜之編敦敦愴愴綱紀門戶有他淑行請以類推一時賢達如春木姚氏訪溪顧氏輩靡不斂手推服嚶鳴翁和定交杵臼之間託好韋絃之末一觴一詠屏山王之貴游爲雲爲龍幸孟韓之並世梁摧哲萎曾不慙遺以光緒庚寅十一月庚寅考終里第春秋七十有二葬於邑之二十九都東軫圩配邱孺人妾朱氏子二長應墀承嗣大宗次應奎早卒無後以應穉次子慕曾歸本支今具狀乞文者也曾孫翼高先生正容悟物虛緣葆真季次懷獨行之風彥輔尋名教之樂削迹捐勢琴尊締其古懽係幽抱和巾櫛載其道氣用能尙髮必著藏璞自輝盜牛不名數馬乃對其志生壙也獨舉湘鄉曾氏曰儉曰明曰慎曰勤曰恕曰靜六訓比於遺金泐諸貞石茭芟末俗其誰知之夙好古文家言發皇道妙根極理宗緬彼勝流咸躋高格故於惜抱類纂求闕維鈔流沫生胝經目過耳蓋較鬻紅友之詞律夢玉局之詩仙致力雖同所性則異著柳氏重脩宗譜十二卷松陵

文錄姓氏考一卷東坡詞編年牋注二卷勝溪釣隱詩錄一卷詞錄一卷日記若干卷類  
皆雅贍莫倫翔實可信客兒有作先成祖德之詩天隨云遙盍繼叢書之刻徵文考獻其  
無遺焉昔嘗游祭酒吳望雲先生之門又因祭酒而致禮於芸舫費中允親見其行無轍  
迹生自馥芬大府奉爲表儀後進憚其風采際此龍蛇起陸燕雀巢堂必將扶將單寒振  
式浮靡滄溟見斗羣言於焉折衷勁草當風善類爲之長氣不幸徂謝及此淪胥先生則  
兩公所敬事者也其風概爲可想已鄭莊年少願攀大父之行郭泰名高久副有道之目  
不慚一字用質千齡

新陽汪先生墓表

吾吳經學大師大都分隸負郭三邑世居會垣別以新陽著籍則爲前學古堂學長汪先  
生先生諱之昌字振民先世自歛遷吳五世祖捐建崑山文廟奉 旨入籍新陽爲崑山  
分縣後人皆以新陽應試故先生仍之先生入學後一充同治丁卯補行辛酉科副貢遂  
謝舉業以閉戶讀書爲事鉅列門籍有年竊嘗聞先生爲學大槩矣先生始本庭訓謂考  
訂古書可自驗識力並可備後人取資嘗命先讀遼金元三史以期用心入細後遂專研

經義以說文爲輔旁及諸史諸子與夫輿地目錄九章家言行文則徑學史漢不屑以八  
家入手家本素封遭亂少替楹書連屋亦灰滅無遺當道聞先生好博覽延入書局校理  
又分應正誼書院經古月課并上海求志甯波辨志江陰南菁諸文課膏獎所獲悉以購  
書屏棄百事寢饋其中故凡所述靡不貫穿本末平決異同鉤隱以達顯舉大以賅細  
金壇段氏序潛孳堂集有曰其理明其氣和其書味深者庶幾近之每歲七月初五日漢  
高密鄭公誕辰必辦香行禮記以詩文則先生私淑之微旨也中年以後伏案勤劬時患  
氣疾然亦未嘗輟業風雪午夜則撫所愛狸奴斂襟展卷漏三四下家人尙聞啟櫃檢書  
聲甚或際曉乃息光緒辛卯鄧公華熙任蘇藩聘主學古堂講席因才指授學者誠服平  
生篤於平原之地門內外族長幼無閒言嘗一赴歛中故山按視先壟祭埽加虔待人則  
以和爲主鐫一和字小印佩之示不忘先訓也生道光十七年八月戊申卒光緒二十一  
年六月壬辰年五十有九著有青學齋集三十六卷裕後錄二卷曾祖諱爲仁祖諱詒德  
考諱樞世有令德并拜崇封配夫人何氏恭儉慈祥肩家政者數十年先生之不問生產  
一意爲學則夫人之助也子開祉辛卯科舉人前官江南通州學正歷保直隸補用道女

三孫三希董希田希范曾孫三嗚呼先生之逝卅餘年矣經師人師之望今則誰克當之聞之咸同以來陳培之部郎倬丁泳之孝廉士涵與先師雷深之先生浚均以通經學古有吳下三之之譽先生固揖讓其閒而知者或鮮矣遺書晚出津逮宏多敬述大要以諭夫考吾吳惠氏江氏以後之學派者歲在辛未八月受業長洲章鈺謹表

深州文學任先生墓表

歲庚午正月僑津友人任賓卿鴻慶造鈺天津僑舍奉其先人狀略請爲表墓之文鈺以禮辭已而君疾疾起復以爲請詞益誠感其能盡子道也乃撫實而書之按狀先生諱逢泰字坦然深州任氏先世自洪洞遷州南北麥窪村曾祖萬盛祖德振父邦彥世有潛德先生生道光癸卯天賦秀出爲鄉塾冠未成童卽能操筆爲文長者皆屬望焉同治六年擒匪北竄被創折至州境肆焚掠邦彥公團結村堡禦之一日出不意中槍而仆昇歸則知傷十餘處血噴滿黏衣不可脫先生忍淚扶護爲滌滓易新四出乞良藥悉心敷治洎創平則肢半廢矣先生益在視左右竭口體之奉奉之邦彥公用是得延壽命者若干年族故無發名成業者先生爲慰親計益自淬厲壬申歲受知於學使者仁和夏公同善取

入州庠累試高等補廩膳生究以父傷臥牀不忍圖進取惟集族中少年設家塾課之卻脩貸書不辭瘠口房眷之中薰德爲衆嘗語學者曰幸而爲人當知爲人大要大要之不知則人而非人又嘗語諸子曰儒者不諱言治生能治生矣則以濟物爲急封殖自恣古所戒也此先生學行之大概也光緒八年卒年正四十配東鹿郭氏訓導遐齡女事舅姑如父母邦彥公創重刳臂和藥以進既儉且慈歲凶減食以調旁近之餓者不給至斥枕中糶益之習聞先生爲善有益之訓督諸子事實業賓卿後遂置田贍族比多兵荒又屢出巨金振之皆先生型家之效也賓卿以銜既僉其請復整襟啟曰吾父埋名鄉社無所建白不肖誠有志稱述慮無以見重於世者銜則謂人之所以爲人者亦視其本原之地何如耳本原之地或虧雖名滿天下言之齒冷行義若先生則又何歎焉昔崑山顧亭林氏慨夫世風日下其序萊州任氏族譜備舉主譜事者斤斤於門內之行欲倡其教於一族因以極致贊歎且推廣言之謂必如此乃可以紓生民之禍今何時也天賦民彝日趨汨沒乾坤不燬安知無剝極而復之一日是則撥亂反正之會求可以爲人之準的者先生非其一歟視顧氏之所以許萊族者又何今昔之分歟用最大要以質方來先生嘗以

賓卿官贈階四品銜特援漢故處士故孝廉刻石之例以文學題額蓋以先生名列士籍  
實行副之垂後文字應舉其尤重者俾志冀南人物者有所考也歲在上章敦睦孟秋月

長洲章鈺謹表

湖北補用知府無錫張君墓表

壬戌秋九月無錫許孝廉同莘手舅氏張太守殉難事狀乞表其墓按狀君諱曾疇早失  
母父字之曰望祀無錫人生而好學尤工書由諸生入湖廣總督張文襄幕府勤於所職  
廉介不苟文襄倚重之歷保知府捐升道員加花翎二品頂戴歲辛亥八月十九日武昌  
變起總督瑞澂棄省會不守匿兵艦中時君主辦漢口火車貨捐局瑞澂索供應局存款  
爲罄局當車站衝礮火橫及員司星散君念守空局無益展轉達上海居兩月復返漢口  
料簡局中未了事爲民軍所偵復圖東返拊輪抵黃石港邏者復脅之還易舟而西乘不  
備投江死時十月初六日也遺骸爲黃州某鎮鄉民所瘞乙卯十二月歸葬邑之開原鄉  
同莘狀君生平甚詳其要者如此予嘗見錄辛亥殉國難者數家而君未與其列未知意  
云何也同莘誠懇篤至有聞於時痛舅氏之死事而汲汲圖所以章顯之者名節所在誼

無假借是則君於地坼天崩之日以一死完大節無可議也予嘗怪文襄竭國家之力創練新軍所求執干戈以衛社稷者身歿未幾適得其反且嘗君文章氣節風厲天下門生故吏類負時望巨變猝起則光沈影寂鮮有能自見者君與新起民軍半皆鄂中舊故委蛇其閒或可苟免而乃不勝其詢出於懷沙沈石之所爲是誠不欺其志有烈丈夫之風矣最錄大要備錄忠義者之蒐輯且以愧夫世之受辱而不死者長洲章鈺表

商城縣知縣吳江陸大令墓表

執友幹甫陸君既卒之十年鈺既徇介弟恂甫之請編序其遺集已復以表墓之文爲請鈺與君同鄉舉君先成進士令中州歸田以後鈺旅泊北中蹤跡不相接中惟辛卯一年君客授會垣與鈺居比鄰日晡必來人定乃別凡君所自策勉自期許者靡不傾倒言之蓋君爲實事求是之學立身制行方嚴敦篤又生長田閒洞民疾苦得所藉手惟欲有所表見徒以矜慎著述鮮所寫定諸子晚出於宦蹟又未能詳述惟留此懇懇款款不負平生之志趣爲數十年老友深許而篤信歷久而不忘此固天地閉塞人物消索之氣運使然不當僅爲君痛而不能不爲君痛者也君諱廷楨字幹甫晚年自號漑釜吳江縣籍寄



居青浦金澤鎮曾祖見球祖日宣父互昭累世以課耕積善矜式一鄉昆弟四人君其仲也幼奮於學爲文有先正法度同邑吳祭酒仁傑特賞之屢丁家艱以監生應省試中光緒己丑恩科舉人壬辰捷禮部試以三甲進士用知縣分發河南補商城縣缺歷署滎澤蘭封鎮平兩充同考官在滎澤特購張清恪正誼堂叢書親與諸士紳講習風教一新庚子歲履商城本任適北方拳匪搆亂時議或爲可恃首施其閒邑之黃皮山土匪且藉端圖響應君灼知其姦將先發制之慮請兵致境中糜爛乃以隨從數人親入巢穴解散其黨其酋亦就縛凡奉到習拳文告概不張貼壹意靜鎮轄境安堵後議和欵外人於商城獨無責言造福地方最大民德之爲建生祠官汴凡十年所莅止必親獄訟減科派尤以士習民風爲根本之圖夙以陸清獻治縣爲法輕薄子輒以陸青天調君君亦笑不辭也

用是官虧日積催符日下會宗人陸文端以典試至汴首以鉅金助君爲寅僚倡乃免吏議洎調鎮平慨然於時事日棘非才所堪遂投檄自劾浩然歸矣宣統辛亥後意興沮喪親故存問略無酬對旋患咯血證堅不服藥醫者謂胸積憤鬱所致殮殍數載於丁巳三月二十六日卒年六十有三聘倪氏娶周氏子常楸女一適松江郁諸子三常澄殤常浩

常深皆幼讀女一未字皆側室沈出葬青浦四十二保著有說文考證經史析疑未成書已刻者遺文詩各一卷綜君一生所自程於政事文學者舉未能躊躇滿志卽鈺未能盡量言之獨稔君家事謂門內之行最不可及先世遺產物給兄壽甫出後長房君遂以次丁代家督弱冠先後累遭祖考及考妣大事獨膺艱鉅幾不獲濟率兩弟爲學皆有聲庠序藏書之室以思耆顏之德清俞先生爲隸古書榜且作記文入集則君終身之慕之見端也猶記當年君昆季屢雁行來顧友恭之誼各見眉宇作古而後恂甫爲君身後事料量周至附閱常浩等近作不失家法皆恂甫爲之督課益可證君之所以待其弟者夫人生一世閒患於倫常之地多所缺憾耳君於家於國於民概無所負如此則雖少歉於彼亦復何足計較君長鈺十年夙致兄事之禮存眞之文責在後死九京可作亦當鑒所述之不誣爲可信今而傳後也太歲在丁卯六月前進士長洲章鈺謹表

會稽周庶常墓表

清光緒癸卯詔用汴闈舉行恩正併科會試榜發會稽周君得元旋膺館選假歸遽卒已而科舉停罷國體改革閱今逾三十年鮮有稱歎及之者君嗣子祖琛以法學名家久官

津上以鉉與君同歲通籍時顧僑寓述君行誼之篤學術之正心焉敬之請表君墓不忍辭也君諱蘊良字味仁自號惕齋裔出宋大儒濂溪元公屢遷籍浙之會稽曾祖諱雲錦祖諱厚甫考諱茂林妣倪氏世營商業習儒無顯者君生而天資敦重識解異常童七齡時卽請以二十四孝圖摹刻於宗祠之新楹通全經後有志宋賢之學尤服膺楊園張先生遺書慎獨主敬不顧趨時者非笑嘗曰戒懼是存養工夫慎獨是省察工夫戒懼屬靜未發之中也慎獨主動已發之和也戒懼爲致中之本以天地位爲極功慎獨爲致和之本以萬物育爲極功又曰爲學當自強自強莫如居敬知難知懼則不敢不敬能居敬則自獨立不懼又曰學貴有漸敬則有恆戒慎所不睹恐懼所不聞此是守約處不勉乎此逐事逐物而防閑之則後矣存養此心其工夫亦在主敬敬非拘持之謂隨時提醒便是敬之下手處論學如此其律已亦如此科舉文非所好以堂上屬望乃悉心從事年十七入邑庠歲科試輒高等秋闈屢薦輒不售設帳講授以正學爲己任甲午中日戰後國勢日替益留心濟世之學與同郡同志設志學會以天下無貧人天下無病人天下無惡人爲職志治經重小學尤嗜音韻成音韻啟蒙八卷自功令以經義論策試士君乃得見所

長歲壬寅得優貢卽捷本省鄉試薦經濟特科閱歲以會試第一人成進士改庶吉士是時朝廷厲行憲政輦下新進爭以才地自見君則不事表襮實事求是冀以儒效報國壽州孫文正公特賞之目爲忠愛之忱出於天性也入秋以母疾謁歸自定方藥以進疾頓起將治裝應散館試突於甲辰年正月二十一日卒年三十有八君家累世仁厚以佐人緩急爲鄉邦仰賴君承家教于請之近理者靡不委曲應之卒之前一日舊交姜某家貧喪母請君題木主禮節繁重力少憊矣越俗舉葬有祀后土神禮以得新貴爲榮復固以請是日風雨劇寒舟輿皆不肯往用事在午夜距家五里而遙君懼爽約乃籠燈山行冰淖彳亍甫行禮而蹶護歸不及醫藥嚮晨遂絕人或以君不自惜少之鉅獨以匍匐會喪不以艱瘁自諉此正君平生義行之一端脩短之數命實爲之固應詳紀之以雪此言者也配范氏生子祖培側室唐氏生子祖慶先後殤女三次適胡餘殤祖琛則君仲弟諱維賢之子也少爲君鍾愛親授諸經期望甚厚今承嗣大宗不隕家問凡君手著書并輯遺著若干卷均寫定待刊君亦可無憾矣嗚呼學術之繫乎世運也大矣曩者洪楊作逆勢可滔天曾文正公獨以忠誠爲天下倡而羅氏李氏諸先生翕然應之入而講學出而禦

侮雲合景從蔚成大業蓋先哲所謂繼絕學開太平者本儒者分內事莫之或易者也君爲滄雪國恥計所定志學會約與時髦之所以簧鼓民聽者大致懸同亦既服習於戒愼恐懼之有年則毫釐千里辨之早辨卽或躬丁奇變胸中之主宰既定於時風衆勢之中歲寒後凋亦何至貽唾罵科舉者以口實此又慨想伊人而如或遇之者也君門內之行甚備不備述述其足以風世而砭俗者以告方來且以慰祖琛不死其親之心歲在闕逢閏茂孟秋月長洲章鈺謹表

仁和王君墓表

妻兄紹廷王君自國變以來屬以身後之文久矣丁巳春正鈺葬弟南返復面爲要約不得已謾應之僅朞年耳君遂煩冤孤憤先我而死也豈不痛哉紹廷諱燮辛亥後自號俟翁仁和籍先外舅濱州府君第四子妣氏陳氏孫生母氏劉幼而端重僕媪不敢狎之洎長益開敏起居動作舉有定程讀書不務廣博而皆得其用知人若有鑒用財若有尺其天賦然也十三喪父寓京求學先後六應京兆試不售光緒辛卯入兩江總督劉忠誠公墓府佐治官文書年最少秩最卑獨以勤慎見器久益練習政要機密重事舉以屬之庚

子拳匪起畿甸政府爲所疊將以天下爲孤注東西各國則糾合兵隊叩國門並時吳淞口外列兵艦四十餘且伺隙攻佔全局皆震忠誠公既定保護東南大計以君議與同遂倚君主辦凡聯合各帥與應付各國事靡不參懷機牙四應嘗爲府主草奏謂從古無以邪教禦敵而有幸者信用此輩國將不國請速禽治毋重外人口實指陳痛切皆人所不敢言時同官多異議許侍郎袁太常朝衣東市後衆益譁謂忠誠主張失中旨君獨阿之將陷不測君置禍福度外屹不爲動辨色入幕丙夜乃出日接中外要牘無慮百數隨時籌答悉中肯要事會旁午不及取決則徑屬草以進忠誠悉畫諾行之契許之隆任寄之重一時驚歎生平建白以是役爲大忠誠之功臣 廟社君佐之也洊保道員加二品銜奉 特旨允准一署蘇松太兵備道一署江安糧儲道歷辦省中要政以建設甯省鐵路績尤著宣統改元有劾江督端忠敏公封事波及君事得白君遂無意於宦途矣謝事居甯乃購廢圃築數廛奉母方塘畝許雜樹環之讀畫校碑其中以自適辛亥八月鄂變猝作甯垣戒嚴九月望後事愈急君圖獨留甯寓迫則躍水以殉有規以無官守有老親乃奉母辟地滬上滬居不易斥故物以充日用所見聞皆傷心之事則託諸詠歌以志悲

憤於綱常大義持之尤堅先後七年壹不爲時風衆勢所奪夙負幹濟名有羅致之者一笑而已庚子歲以勞致疾旋成積飲時作時愈至戊午三月大劇綿悞至二十五日遂卒生同治七年十一月十四日春秋五十有一娶及氏繼娶施氏女一遺命以兄子昌林兼祧爲嗣返葬西湖仙芝嶺君工筆札日可萬言凡關軍國大文字以幕僚所職誼不存稿辟地後撰辛亥茹痛記自比所南心史未嘗示人詩稿一卷自訂年譜一卷寓意編二卷皆手寫待刊嗟乎君之齒未也易竇以後檢出遺筆一冊處後事至詳工整如平昔是其對於白日魑魅故人豺狼必有忍無可忍而遂以一瞑不視爲幸也古來氣節之士固無意後世之名而名卒歸焉今則天澤之義其誰喻之顧乃蒿目奇變甘促其生夫果何所圖哉亦曰不欺其心已耳聞之自欺其心雖生猶死不自欺其心者自必雖死猶生君今逝矣吾知體受歸全赤石不奪可以見先人可以質列聖理得則心安又安問夫不知誰何之世也敢書其大以償前責九京可作庶幾鑒之嗚呼太歲上章涪灘長洲章鈺謹表





# 四當齋集卷九

長洲章 鉉

文九

德清俞曲園先生八十壽序代恩藝棠中丞

光緒庚子十二月二日爲德清俞先生八十正慶之辰先生爲翰林二十三科前輩自視學中州罷歸僑居吳門主浙江詒經精舍講席三十餘年先四年丙申已重游泮水後四年甲辰卽重赴鹿鳴又六年庚戌卽重宴瓊林所著春在堂全書海內宗仰覃及同文之國文孫階青則已由鼎甲入詞館聲聞之遠福澤之隆宜稱壽者莫先生若也先生先期作詩力辭又預飭門者至日下鑰不許通一客於是與先生有連而官於吳下者咸若歉然於心而謀諸某某固習聞壽文非古爲知言君子所深訾究其致譽之由則以名德不稱不能無一二假借之詞儒者以失言爲恥用兢兢焉先生名滿宇宙就其生平所歷據實最錄累牘不能窮其辭曾何疑於假借而某猶不欲徑同之者則誠見先生之得於天者自有真也先生篤於門內之行母夫人棄養時年已六十爲孺子慕事兄福甯君敬愛

敦篤沒世不渝操守清特賣文之外餽問一不至門食蔬衣布旁無媵侍三黨之戚咸與  
沾被旁及施舍任卹歲有恆款後進小子之稍雋異者必曲垂盼矚獎而成之胸次清明  
廣大無所不容憫念時艱不無感喟而神觀聰俊如五十許人生平一意著述嘗謂 國  
朝經學略分三派徽州則江氏戴氏爲宗好言古制而未切實用常州則莊氏劉氏爲宗  
專求微言大義然影附者多流弊滋大惟高郵王氏以經證經以小學通經學博觀慎取  
不失許鄭家法故所著說經之書累數十種皆足質往聖開來學其他論事之文則又洞  
見治體遠規世變惟蘧伯玉孟皮崇祀兩廡得見施行續輯學海堂經解則長沙王祭酒  
成之餘皆著在簡策讀先生書者無不惜先生之以山林老也然天之待先生則有故矣  
自昔傳經大師皆享老壽而往往生於貞元相際之時蓋天下之變必由經之不明而邪  
說始暢猶之星日旣晦而燭火乃光天於是時生一人以救正之其在易之象曰碩果不  
食苟卿伏生高密其職志也方今萬族喧阓不知所屆求其定於一尊默持世柄較古爲  
尤難先生巋然東南之表負荷滋重其聰強純固有莫之致而至莫之爲而爲者人人之  
壽聽之於天幸而得之則遂震而驚之先生之壽信之於天順而應之亦遂淡而忘之明

乎天意之有在則先生之不以壽自居夫亦可以觀其深矣昔歸氏震川方氏望溪以壽文入集不能槩人人之心爲其文是而其人非也某幸遇其人而文固不足以抗之要其爲當世儒者之公言則無疑焉耳輒援此義以復同人以質先生并以告世之欲壽先生而未獲致其情者

元和陸中堂師七十雙壽序

元和相國師既正揆席之明年五月先後屆吾師與吾師母吳夫人七旬正慶師以匡時正學由一甲第一人忠事三朝敷歷四十年遂膺枚卜天爵人爵冠冕宙合際此覽揆令節與有雅故者僉援大雅崧高故事頌美於堂某等列門下有年謀所以申其敬者以鉅幸生同里辱與裁成之末遂舉稱觴之文過相委重屢以不稱辭未之許也鉅嘗讀唐宰相世系表而知平原相業莫盛於有唐而上不負天子下不負所學則必以宣公爲魁斗明德未遠遂生達人擬必於倫殆無以易伏而思之則以爲文章之淵懿道德之純備吾師固已纘承家學先後一揆至於元氣和會翊鼎祚而彌丕基天眷攸隆莫之或抗揚摧其事則宣公當日實有所不逮焉何言之宣公仕有唐多事之秋得君之初實

以代言見重水乳之契誠未有倫泊拜中書侍郎同平章事則君德既替動與公違裴吳之徒遂從而閒之湘鄉曾氏之論宣公也有曰事多疑之主將之以至誠如御駕登峻而不失其馳推崇雖至遇亦艱矣師自官翰林後所歷皆清要當官官辦未嘗有纖毫干吏議自少卽以氣度高天下不自立厓岸絕人攀躋然當大利害所在雖極時風衆勢之所趨屹然不爲動以故戊戌庚子之閒物論殺雜覆轍接踵師獨以清忠粹白上答 聖明天下想望丰采以爲難能在南書房十年禁池清切每獨對 上必動容嘉納又嘗奉 詔進講尙書講義以爲心法治法其理一貫一正君而國定道莫有先於此者用是鉤元提要於二帝三王出治之本致治之原靡不反覆開陳藉爲泰山河海之助陳善納誨既稱 上旨 殊錫寵賚書不勝書師學術純正爲 九重所知聲應氣求必多端士每屆貢舉之歲與夫 殿廷考試文字之役必膺 特簡從事所得士必修飭無少累知人之明者宣公嘗一知貢舉得韓愈等二十二人時稱龍虎榜視吾師識拔之盛其謂之何蓋 聖主賢臣之相得千載一時抱負雖同遇不遇之閒其效遂懸殊焉援古以例今固知其未有合也載之權氏之序翰苑集也謂宣公才不謂不長位不謂不達逢時而不盡其

道則歸之於命綜論生平寄慨無盡如吾師之矜式百辟歸然爲先朝耆舊之臣方今  
聖天子天亶聰明如初日之升於暘谷吾師乃心王室翼翼翼翼必更有嘉謀嘉猷以  
敢以沃以光我 聖清億萬年無疆之治俾世之致歉於宣公者求之吾師則天人相與  
之際昭明顯融無少幾微之缺憾焉豈不懿哉聞之善言德行者弟子之所有事也既就  
鑽仰所得復同年諸子又別爲歌詩一篇以祝難老以志小子欽欽之夙懷詞曰  
水有具區山穹窿元宰蔚起徐潘同吾師繼之效純忠上應元象扶泰鴻古稀偕老福德  
崇木公金母明且聰斯于南山氣鬱蔥堂前笙詩歌三終願仿茶串獻相公操吳歛者宜  
吳蒙

海豐吳侍郎八十壽序

石蓮先生於丁巳初吉屈八旬正壽時先生辟地海濱逾六稔矣抱天地閒無窮之感舉  
生平數歷之盛建樹之隆均置諸露電泡影不足控搏之數人道淪胥日非一日獨愴深  
矚志事不伸以鈺悌知讀書不惜自降涯分齒諸小友之列旬一至焉月一至焉每見必  
詳述先世舊聞與夫道咸以來老輩之學業傳派并時出所著詩詞諸稿令與商定藏有

舊槩名校則出諸篋衍通假而不厭蓋先生事事以古處待鈺鈺亦得以薰德善良不至爲時風衆勢之所劫窮居之樂此其一也際茲展慶之辰以文爲壽若猶循俗專陳無論非先生所樂聞卽鈺自返良知亦不敢以褻長者耽思旁訊輟筆者屢矣閒嘗論之天地閒有有用之用有無用之用時乎其常則以一身成天下之務以見吾道之大時乎其變則以一身肩人倫之望以見吾道之尊方今邪說充塞四維不張由乎氣運者不能與天爭成爲習俗者不能與人爭陽爲陰賊在易爲剝設乾坤從此而息則亦已耳猶是中夏猶是圓顛方趾之倫而因以權相脅以利相市非聖無法以禽獸爲歸者遽謂神州從此而陸沈炎黃之胄從此夷滅無遺類吾知雖極忿世疾俗之徒必不忍昌言及此是則存亡絕續之交正自有其人焉而起視先生則所學猶曩之學也所言所行猶曩之言與行也所以刑家而式後者則仍累世恭儉之遺也所以接人而遇物者則仍古昔忠恕之道也有信守無走作有悲憫無怨尤爲風雨之鷄鳴爲歲寒之松柏蚩蚩者謂此木彊耳此不通時變耳庸詎知天地生機之所繫聖賢正學之所傳羣天下皆破壞蕩決不恤其後而惟此當代老成人深根甯極獨爲人倫之元氣所寄焉無用之用較諸有用之用其操

心也隱而其收效也神深甯王氏有曰召平董公四皓魯兩生之流士不以秦而賤也伏生浮邱伯之徒經不以秦而亡也萬石君之家俗不以秦而壞也懿歟先生庶幾允蹈其言而爲生民所重有賴者歟鉅幸厠親炙之末藉以增長志氣故敢特發此義以侑觴祝放言之罪其曷以辭頌曰

不言之教無爲益修道養壽與天適歷商逮周歲九百後來渺步猶龍迹東國人倫今海豐坐閱世變如飄風三古墜緒興諸躬伏轅申寶誰與同天半朱霞雲中鶴世人相望在寥廓悠悠寸抱獨有託要將淳古迴涼薄春回瀛海七二沾白鬚朱顏列仙儒南仲原父歐公徒上壽請借雙虞壺

常熟翁廉訪六十壽序

吾鄉弢甫翁廉訪自辛亥歲盡棄官僑津獨居深念於二百餘年與國休戚之故志不得伸乃姑託於蕭然高寄之爲同時朋好及流寓諸賢咸欽重名德樂數晨夕閱今八年矣歲在屠維協洽仲春吉日屆廉訪周甲雙慶僉謀所以致其情者謂鉅鄉人也督爲觴祝之文鉅以不稱辭未之許也竊嘗論之生民以來變故無極惟律以聖賢之學乃能隨時

隨事而得其中千古貞臣節士所遭之境不一端其所以自盡之道亦不一端幼安表聖之徒尙矣而經論定於考亭朱氏西山眞氏者惟潯陽陶氏一人夫其抱五世相韓之志目覩天憲民彝之大或幾乎息何嘗不欲如魯叟汲汲彌縫而使之醑事既無可柰何則遂縱浪大化不喜而不懼今讀其集舞干銜石之誠時亦微露其風采究其與人以共見者不過曰樂琴書已耳愛邱山已耳悅親戚情話已耳且其借以自晦舍此若不知其他者則在酒曰述酒曰飲酒曰止酒凡身之所值凡心之所寄其詞在酒其意則不在酒雖復漉巾種秫世終不以沈湎目之蓋其生平學問之大之正在乎樂天命而不疑故榮木之賦與逝水之感同貧士之詠與簞瓢之樂同幾於記所謂無入而不自得者不降不辱中清中權先聖後賢異途同轍士大夫處元黃之會求所宗法者固莫與尙也廉訪席累世韋平之業視長沙遺緒光顯過之年十八卽擢巍科授館職依流平進宜參鼎輔以家門方盛善自斂抑一麾出守洊陳臬事與捧檄彭澤聊欲絃歌者抑又不同不甯唯是讀書不求甚解一言爲後來章句儒生所藉口廉訪則生子游子故里文學之傳芻風相扇曾門文端公泊從祖父文恭公先後以老成典學爲兩朝師傅君疇務成標映國歲光



緒中葉文恭公當國屢總文衡廉訪已推翰林老輩莘莘學子咸埽門擁篲奉手請益沾  
溉所及一時羣以通經學古爲高廣與狹殆未可以數計也雖然異焉者跡也同焉者心  
也異而實不異者時變之所趨無如何也不同而卒歸於同者君子之自處其揆一也天  
憲民彜之故誠未易大明於天下而貞臣節士之所以斷斷者要必求無忝乎所生廉訪  
夙以知命樂天爲學時運至此固不得不爲淵明之所爲亦姑以酒自晦卽鈺之前席致  
詞所以爲廉訪壽者亦終不能出乎淵明之文曰是大澤之仲倫而商山之黃綺也是又  
吾鄉朱柏廬先生壽徐俟齋先生六十文之前例爲廉訪所習聞而不訾其不類者也屬  
稿旣竟以質諸老僉謂無失辭遂褫鞞踞敬以爲獻

德清俞封翁六十雙壽序

天人之際微矣哉就一家言之就一家之已然者言之固有安常處順日進光明舉書所  
謂惠迪吉易所謂積善餘慶諸說一若握符執券甚彰明而昭著也試追溯其震撼顛頓  
之初則不啻一葉之舟放乎大海颶風乘之傾覆在指顧閒此在當局誠不意自全卽局  
外觀之亦何敢執信天之說謂蒼蒼者之終不負人也然其愈剝愈復愈困愈亨卒舉向

之萬萬不敢預必者一一償之而適如其分世鮮不謂其權在天矣。鈺終以爲其權在天而其事則在人何言之以鈺交游之列而獨推爲家門之慶者固無逾階青同年者矣。接武祖庭能謀祿養歲在旃蒙大芒落以尊嚴慈並登周甲將於仲春月吉日捧觴上壽凡在衆賓之列亦靡不影纓曳組佐一日之歡人生至樂孰大於是。鈺里閨近接託昆弟之好有年得預盛事固深爲階青慶之雖然春在堂數十年近事則知之夙矣竊謂今日之門戶鼎盛固由吾年丈壽山先生承忠厚之澤橫罹美疢故嗇於一身者豐於一家然其千回百折幸而得濟則非我年伯母姚宜人不至此撮要言之蓋彌可喜而彌可懼也。年丈賦性敦篤少好詞章之學出語驚人。有雛鳳之目同治初元曲園先生自河南學政罷官僑吳遂援例得官以需次奉親嘗奉檄之奉賢縣獨居蕭寺若有物乘之得迷罔之疾類乎列子所謂秦人逢氏子者療治得愈先後誕生階青姊弟二人旋即大作迄今卅餘年曾不少間當其疾之初也大母猶在堂宜人既隨尊章之後摒擋一切無何太姑尊姑相繼棄致太公既以天屬之戚姑以著述自遣階青時未成立羈屣就學門內之事遂一以身任之以婦職代子職以母道兼父道兢兢業業日慎一日一切不如意事紛至沓來

趨視良人則又嬉笑怒罵不能自主憂傷憔悴幾幾不自克曾幾何時氣運大昌階青則  
登上第典蜀試馳驅王路駸駸光大孝事君舅既臻大年又以鄉舉重逢荷 聖明褒賞  
膝下諸孫羅列瑤環瑜珥秀茁可愛我年丈雖貞疾弗瘳然亦眠食如昔門內吉祥善事  
則宜年受福相與同之亦若有足以自慰者且夫可憑者天也不可憑者亦天誠可憑也  
則我曲園先生師表東南仁人之言利及萬世躬爲允嗣宜可承前蔭而履亨衢而乃抑  
塞沮喪至於此極誠不可憑也則當年丈被疾以後家運不可知宜人以一婦人拄撐其  
閒卒能前沈後揚實證夫貞下起元之至義從可知太虛無昧之表本不可以庸俗之見  
妄相推測而惟大賢大孝乃能使神明震動曲意相全蓋經數十年之漂搖拮据而幸有  
此一日者固實有必至之理而非聽乎適然之數也晚近壽文之作大抵言家門聚順者  
居多湘鄉曾氏則好言艱苦卓絕之行謂致壽所由來 誠不達於文而平昔聽覩所及  
則有未敢失之誣者輒書其實於稱觴之吉再拜獻之且介階青進質於太公論定其說  
俾天下處無可柰何之境者知人定勝天之說稿有可據觀於德清俞氏之已事而豁然  
有以自壯也

元和陸師母八十壽序

同治甲戌 穆廟親策士於廷賜吾師元和陸文端公進士及第一吾蘇舉狀頭者眷屬有登城撒穀故事吾師母吳夫人奉君姑踵而行之騎乘所經士女圍塞時距髮逆之難未遠有知平原近事者嘖嘖稱夫人來賓之初避地滬上黽勉拮据其事至難能時鈺甫十齡粗解事親見之且親聞之也宣統紀元鈺始入京供職越歲庚戌屆公七旬雙慶時公已官大學士授 皇上讀夫人則已累拜恩封列九命婦之首顯融光大爲衣冠盛事曾幾須臾而夫人春秋躋八十矣十年之中邪說橫行人倫道盡文端公則鞠躬盡瘁歸覲 先皇夫人亦不忍久依日下挈家返金閭老屋際此設帨有日夫人感於家國之故豈樂以壽自居鈺幸列門下奉君子之教亦安敢沿世俗觀美以瀆我所尊者雖然求諸鄉先生則固有其例矣俟齋徐氏之壽吳母八十也曰太夫人生長華胄積習名教故施於家政動合禮則事尊章則孝相夫子則順而教子則慈而嚴柏廬朱氏之壽朱母八十也曰當烽塵橫塞海內沸鼎之秋母則蹈萬千辛苦以來以有今日壽汪太君九十也則曰太君之爲人婦有得於春秋之教故隨其所處嶄然歸於正義而不愧乎其分類而

論之兩先生豈不知祝延展慶爲承平時事彼數老人者並已經歷桑海在女遺民之列顧乃連狝其詞可已而不已則以好是懿德爲秉彝之所同抑又懼夫賢明貞順之美或難嬗述於方來故遂就耳目所及標舉一二以樹隄防而立孳的視夫震川歸氏之壽顧文康夫人流連乎太平相業以寄感喟其意固遠且急也今何時也女德之墮落幾爲士夫所不忍言以方明季奚啻萬之而我師母夫人於流離顛沛之秋不失婦職則既有然矣光緒一朝皆吾師在朝服官政之日舉皆吾師母在京邸主內政之日事親逮下有禮有恩而又使命不越乎梱闔車從不飭乎游觀珍綺不炫乎輿服合乎古所謂高而不危滿而不溢者國事如斯家事如斯則遂命令子麟仲擗擋南返而又不忘在昔以儉德率先羣婦修葺累世之墳塋流播先人之著述至於列聖所賜宸章奎藻與夫書籍服玩則又分別尊藏以寄先朝弓劍之思以作彼都尹吉之式門生故吏有起居夫人者庭戶依然也禮法依然也以較俟齋柏廬諸先生所稱道所見爲尤大夫亦足以愧天下之忘本者矣則謂文端公以正學匡君立當世臣道之極我師母以純德照世立當世婦道之極用以章聖清敦崇風教之報而爲舊家保守世澤之法其誰曰不然易有之曰

安貞之吉應地無疆三聖遺經至今著蔡是則我師母之德之壽無窮而四十六年前道旁列觀之童子俯仰世變猶欲講明陰教存人道於幾希者其期望亦與爲無窮也

元和陸師母九十壽序

曩歲庚申<sub>鉅</sub>徇同鄉諸君之屬爲我師母元和陸相國夫人成八秩壽文一篇既述師母佐先師文端公數十年貞順賢明有光揆席與夫辛亥以後足以供女遺民師法者甚備且舉明季蘇賢俟齋柏廬兩先生壽同時數壽母之文以資尙論私幸無失詞也越十稔歲在上章敦牂夏月又屆師母九旬崇慶巾幗偃佷宜列惇史鄉人復援例爲請<sub>鉅</sub>遲回者久之以爲重演前說雷同可羞以感慨行文又非爲長者上壽之體無已則請本文端公勉<sub>鉅</sub>以讀書遺旨於經訓中求之乃端牘而書曰謹案漢書律歷志曰數紀於一協於十是數至於九數之備也素問曰九者天地之至數也故九訓爲究又或通久積算至此崇高至極又案九十曰耄見楚詞注而七十曰耄見鹽鐵論八十曰耄見左傳杜注似耄之爲名不耄屬九十惟許祭酒說文則分別言之於老曰七十曰老於耄曰八十曰耄而下繼以耄則曰九十曰蓐蓐之爲字與今隸之作耄不同从老蒿省聲蓋謂老之最高者

蒿屬草類許氏說此字必取聲不取義段大令注謂从蒿者取蒿目之意似涉望文生義是年至九十古人特造此字以光顯之固非七十八十者所得冒也又案汪中述學釋三九篇云九者虛數也凡數之不止於九者古人皆以九概之引據經典其說至詳蓋前數義爲壽人言之由汪氏之說加以推闡則凡爲九十稱祝者所應且歌且舞以致其頌禱者也昔<sub>鉅</sub>壽師母之文有曰文端公以正學匡君立當世臣道之極我師母則以淑德照世立當世婦道之極蓋就同德同心言之也自今思之女德之不修婦學之不講十年以來更非昔比吾吳清門名族推爲鍾禮郝法者固不乏人而名不出於中樞齒不列於尊行未必使爲人女爲人婦爲人母者使之歆羨使之觀法獨我師母以九命婦之首樹其坊表溯夫吾師未通籍以前與夫我師母擗擋還里以後凡夫所以處齋所以處豐所以處常及所以處海桑之巨變者靡不有實事之可指大經大法之可循不甯唯是文端公門生半天下陸莊舊誼不少起居八座之人或亦與聞懿美歸告其家時風衆勢之所趨安知無挽救於萬一是則天以陰教之修明將於吾師母是屬龐視鴻祐安可涯量<sub>鉅</sub>不拜宣文絳幔者閱廿稔矣比從公子麟仲問訊藉以聞吾師聰明康勝雅同疇昔主持家

政一帥其初凡年家故舊與三黨卑幼之一覘壽母顏色爲幸者仍假以便坐誦述舊言是則記所謂旒期稱道不亂者與許書所載懿義適合而述學所云凡數之不止於九者古皆以九概之又將於平原家慶實證之也吾蘇之以人瑞傳者惠氏有百歲堂之築家藏書目載在郡乘陸氏與惠氏同籍元和以師母之得天獨厚閱世方新轉瞬數春秋必將特建崇坊與元宰標題互輝映於金昌亭畔此誠邦家之光而非僅閭里之慶矣屬草旣竟敬以爲壽吾師母垂覽之餘或嘉銜尙能不忘文端公遺教根據經訓颺言得體且與前獻一文有南山詩人言之長言之之旨王母一笑天爲春不勝大願又不勝大幸也

太倉陸太君九十壽序

鄉先正歸震川氏始以壽文入集其當時爲賢母作者至盈一卷大都六七十至八十年而止九十則無之獨壽母堂記一篇則備言正德閒崑山許登仕盡心色養其母趙氏年登九十因榜其堂銜嘗得而讀之以爲世際承平壽人出於閨闈固其宜也若夫陽九百六時變紛乘而獨以王謝高門郝鍾淑範曰耄曰耄游近大齊則其膺天鍾慶爲世作程有非尋常祝史之徽言所得旣其美者年家太倉陸君孟孚奉尊慈太君錢太夫人板輿



駐津以來閱今十有七年前十年庚申春秋八秩一時登堂稱祝者既極烏弈光融之致  
康強逢吉積算益崇今歲在上章敦牂孟春上吉重屆太君九旬正壽吾鄉人之僑津者  
咸以龐褫鴻祐海內少雙擬仿南山有臺詩例一則曰遐不眉壽再則曰遐不黃耇以皇  
邸之文委重於鉅不敢辭也竊謂國體之變更也久矣姑以庚申以來計之民風奚若人  
心奚若又以天津一隅言之紛華靡麗習俗移人者奚若以習俗移人至顛隳而不可究  
詰者又奚若蓋言家法於今日也難以聖善在堂維持清門之舊用以光前而裕後尤難  
之尤難也太君出兩代開府之門來歸鼎元子舍恪循婦職堂上賢之既相汝甯府君踵  
武玉堂一麾出守廉惠之政謳頌至今教督令子以修身立名爲本孟孚遂以門子馳聲  
早領一道又督教諸孫以崑門之學出供時用曾孫林立長者將冠矣其教督也如初肩  
持內政七十餘年常變豐約處之一槩蓋爲賢女爲賢婦爲賢母先後載筆之士亦既發  
揮而光大之矣顧鉅獨斤斤而別有所稱者則以世風愈趨而愈下母德固愈躋而愈高  
試觀浩穰析津綰轂南北蜃臺鮫市環貨如潮凡夫游觀之所日新月異而歲不同孟孚  
負米頤親苟可博老人歡悅者無所不至而太君則未嘗一更服飾一御珍錯惟是安神

閨房不聞不覩春秋佳日求偶一命駕而不可得又日進孫曾輩申儆以世德之不可不  
紹時下氣習之不可或染不甯唯是孫輩婚事必稔其詩禮舊門與謀良對而新秦華侈  
之族從未一通饋問焉蓋以身作則有心世道之君子咸以孟母曹大家方之如此私嘗  
譬之在彼者舉所謂庶草萌生與時榮悴者也惟是翠柏蒼松生是使獨神皋秀壤閱劫  
如新其在易恆之象詞也曰恆其德貞惟其恆也所以貞也坤之象詞也曰含宏光大惟  
其含宏所以光大也三聖法言炳若著蔡異說蠶起斷無有易此理者百年人瑞惇史有  
光愛日悠長若是指顧吾師德清俞氏春在堂集有項城袁母百歲壽序一篇於懿樂頤  
齡推闡詳至鉅也不敏竊爲太君濡筆以須矣敬獻頌曰

昔聞王母領袖羣仙又聞麻姑閱海成田懿歟太君巾幗倨佗鮐背鯢齒臻此大年維此  
大年允基大德專一均平鳴鳩不忒自天右之永錫爾極後隆之山長生之國太君有子  
年亦古稀朝朝蘭膳夕夕萊衣國人稱願報答春暉行追佳話太宰楊巍神策方新禮宗  
誰偶鐵齒金牙爻符福受天姥一峯下視培塿綵勝金花請年年上壽

王外姑七十壽序

歲在旃蒙單闕嘉平穀旦爲我外姑王母劉太夫人七旬正慶先十年乙巳鉅曾以文爲  
壽維時外姑正就養甯垣稱慶之期冠蓋駢集豫大豐亨之況詞不足以盡之曾幾何時  
則已如幻如夢不忍追溯之矣辛亥以後四兄紹延既高不仕之節辟囂海上三兄叔銘  
旋亦謝晉事歸養五兄筱塢則先已卜居滬濱既更桑海而骨肉無恙團聚膝前其福殆  
非易遣至於起居之節賓從之數則似不免有今昔之感者奉觴展慶何說之辭鉅獨以  
爲凡事皆易而惟隨所遭際不改其常者爲最難時風衆勢所迴薄其力可使東西易位  
黑白變色風雨如晦雞鳴不已古詩人以嘉士君子之不以洵洵易行者誠以此詣之不  
遽覲也我外姑賢勤慈儉出自性成家本寒素洎適我先外舅光祿公則從宦方州閨房  
諧適凝香燕寢僮指踰千維時我外姑處之如平常及光祿公謝賓客公私赤立故鄉又  
無一隴一廛之足以自贍外姑乃挈所生子女各三人僦居京都猥巷以長物影質度日  
支持拮据生事淒絕而我外姑則處之如平常始俞叔銘之請就養晉省旋俞紹延之請  
舍晉來甯紹延爲江督劉忠誠公所辟列幕府高席軍國大計靡不取決一時顯貴皆影  
纓曳組修拜親之敬秦淮風景甲東南豪門內集四時繁會咸欲一侍太夫人顏色而我

外姑則又一槩謝絕處之如平常泊乎甯垣變作奪關而出兵火搶攘幸而獲濟滬居塵  
雜回首秣陵寓園風景或不免邑邑於中矣荏苒四年閒而我外姑則無餘戀有餘適若  
遺若忘若帥其初先後數十年他人所歆羨所充詘之境自我外姑觀之若無足以或槩  
於心者自非大智慧大福德安足以臻此易繫辭之言曰樂天知命故不憂安土敦乎仁  
故能愛列聖微言隱若符節閨房三達德夫亦足以式天下矣錄列甥館有年每懼始終  
易節爲門楣之辱恭屆悅辰敢就所親見者敬述懿美於萬一並獻頌曰  
安貞之吉其象曰坤母也肖只乃大厥門增華改葉視彼寒溫翳松翳柏天與之根戴春  
芝勝欵歲椒尊祥源福緒如日初暉婆婆老福異世同論以永年壽以昌其子孫  
錢塘許節母六十壽序  
一姓以門戶爲重其責男子承之男子不幸而以撫孤成立屬望其妻遲之又久重立門  
戶此事談何容易歷代所以有旌表節孝之典節也者對夫而言孝也者對一姓之嗣續  
而言也然而人事雖盡天或限之以錄所見或無孤可撫或撫而尙未成立既成立矣或  
未能得寡母之歡心者往往而有此所以於吾婦之同母姊許節母六十壽辰不能或已

於言也節母配錢塘名族子許君書曾書曾試官揚州鹺務聽鼓謀升斗固儼然有門戶者也光緒辛丑十一月<sup>鉅</sup>續娶仁和王氏時外姑就養江甯婚禮議在內兄緯辰元和縣任所舉行節母奉母命送妹來蘇因得以禮見無幾何書曾以弱疾告逝所遺子以權乳名三順未周三歲揚州無可寄託不得已挈以權歸依諸兄宦轍流轉輒隨以往宣統辛亥後諸兄悉僑上海母又篤老則侍母側者有年以權初入塾繼入校學成未能得食乃北來一再蟻變得充京奉鐵路路員此二十餘年中以未亡人翼一孤雛於邁姑既不虧禮節於諸兄則曲加調護傷心之故與誰訴之以權少也弱勤閔至極稍長則慮滬風淫侈或染惡習能遠游矣風霜寒暑之變居住衣食之瑣無一不在魂夢中日長程遠不敢問天之究竟如何節母不自道幸附密親則耳聞之目見之也以權充路員有年應授室矣乃相攸於皖南潘氏成禮後乃挈新婦來津始賃一廛列於編戶蓋距邗上毀室時幾三十年爲一世矣節母自幼卽以好氣性聞內外長幼均以菩薩稱之以權落時風衆勢之中亦能以悅親爲事頻年啜菽飲水和氣滿室前年舉一孫去年又舉一孫左抱右挈顧而樂之回首從前種種不堪之境遂若揭浮雲而見白日其在周易所謂苦節而馴致

乎甘節者也方今人倫道盡女德益荒舉世不知舊禮教舊道德爲何物在昔楔綽旌門之事誰復齒及且以權所處又約當此家慶屆期更不敢效世俗徵壽之爲鈺則廉知大槩懿好所同安忍默爾曩者以權成昏以四詩勗之今更特草此文爲節母壽卽仍以爲以權勗且以告世有撫孤責任者俾知天道不可知而實可知觀於許節母之晚福可以興矣辛未正月

孫氏妹六十貞壽序

歲在癸酉日人略東三省後熱河繼之軍鋒所指舊都與天津皆岌岌余寓都中歸孫氏妹則寓津上後事不可知念及四月中屆妹六十悅辰世俗酬應文字可以謝絕妹有義行而不聲言之則非我先人憐女之本意也妹名鑫字稚蘭少余九歲笄年許字鹽山孫壽芝孫爲邑名族君舅展雲先生爲蓮塘尙書孫而漢軍徐相桐之長女壻也服官蘇省上游引重以余負文望爲壽芝讀書計堅請我女弟爲子婦不數年而壽芝不祿妹請於吾母將過門守貞余以非古制尼之卒不能奪乃允焉時光緒戊戌五月妹年二十五也孫氏家法嚴重君姑尤素貴夫姊佐家政夫弟嘉樂毅夫始就塾親房同居者尤多妹壹

意以婦代子執勤下人長幼內外無閒言宣統辛亥四月余官外務部假還治弟亮之之喪妹附便送夫柩歸葬隨余寓京師革命事起十二月君舅遽卒滬上妹子身由秦皇島轉海南奔全家浮寄以斥賣度日余先棄官僑津門以筆墨自給力爲毅夫圖一席速之北還於是儻居鄰近得兄妹聚首者十有八年毅夫生數女後生子逢吉妹卽撫爲夫後毅夫未幾歿家況益不支時內戰迭作所寓津北郊軍隊雜居風鶴時警君姑又老病臥牀由充裕入困頓至難扶護妹則心所能及力所能致靡不曲如姑意日失食夜失寢他人或以爲過當妹則安之用是君姑忘無子之痛者逾五年而卒未幾寡弟婦又逝逢吉漸長由小學入中學擢擋督率一身任之計自歸孫門以來三十五載爲家境所迫則至苦爲時變所乘則至險閱時亦已久矣而妹之精神筋力尙如中年此則爲之兄者所爲深幸者也余同胞多人得成立者惟亮之弟及妹而已弟以營業南北不恆家居先朝議公棄養時余年二十二妹年十三妹習見吾母持家勤苦稍長卽不避勞辱趨侍左右吾母以積瘁之故五十歲後入秋每病或春深方起猶記戊子十一月病最劇時風雪長夜兩人默聽聲息有所動作相諭以手伏枕進藥承衾接便妹獨任之役一鄉女令脫鞵蹠

躩樓上下少替浣濯炊爨事如是者累月光景如昨今誰知者而妹且以事母者轉以事姑以貞見孝難乎不難妹守貞及歲例應旌表顧以方今政體既非所尙女德淪喪又誰復矜重妹所爲者故遂據實書之以付逢吉將來纂修家乘列入此篇余亦可藉以告先人矣逢吉其勉於學行重光門戶此則余於妹供壽星紙日所致祝於無窮者也長兄鈺撰文命子元善元美元羣元羲孫鼎保熊頓首拜祝

天津林君墨青七十一歲贈言

吾吳范文正公作秀才時以天下爲己任有志之士舉以自勵者多矣鈺則謂有公之抱負必兼有公之遭際乃能克副此言否則窮大失居一無成就數十年來野心之徒則又用自標異敢作敢爲甚且利用之以逞亡等之欲其弊乃與借張子西銘同胞二字號召黨徒借顧亭林氏天下興亡匹夫有責一語操縱時局者一轍生民之禍至今爲極推原禍始何莫非儒冠儒服者有以階之厲也鈺無心於世者久矣僑津以來益以客子畏人不敢有所論列私獨就平昔之託爲氣類者心焉數之其人爲衆望所歸亦既聲施爛然而起視其家則家況也如前進考其人則家法也如前則未嘗不心藏心寫願舉以風天



下謂夫不失讀書人本色者在今日則難之尤難也林墨青先生天津五十年來名秀才之一也自光緒季年佐侍郎嚴公興辦學務其他社會事業或綜其成或倡其始道遠任重閱今將一世當局任之鄉人肆之其爲人也明允篤誠造次顛沛未嘗或易主管之事既夥筆舌互用從不告瘁緣此致疾已復然蓋亦以天下爲己任姑施於一鄉一邑間者家本儒素老屋數椽不嫌湫隘敬事兩庶母並臻毫蕙義方教子子亦肖之孫行林立無少染儂薄之行蓋於鉅所謂家況如前家法如前者僅僅見之萬怪惶惑之秋顧有一人焉出有所擔當入有所師法俾地方隱食無形之福者微先生其誰歟文正之遭遇不可及其抱負則異歟否歟知先生者必有以衡量之也丁卯以來邑有崇化學會之設先生與諸薦紳董其事延鉅主講席鉅固以吾吳趙氏江南老教書自目者與先生之趨向異而求其不改讀書人本色也則同來歲正月先生春秋七十晉一矣爲述所願言者以質於先生卽以爲先生壽

天津華壁臣閣丞七十歲贈言

夫己氏以世臣之後挾不臣之心怙恃詐力躡登要路其假公濟私得逞異志卒釀成振

古以還未有之變局者其操術有二屬於武者以練兵爲名其餘毒爲軍閥授反對者以藉口勇內鬩而怯外禦民殘國削歸之劫數無如何也屬於文者愚弄親貴交結權要而外凡夫負有時望者引援薦剡以功名動之於是根本淺薄之徒少不自持無不入其籠絡洎夫始借民意後干天位昔之拜恩私室者亦明知其不可也背之不能拒之不敢惟有相與淪胥無從自拔論者謂氏之得廁於搢紫之運者由據北洋形勢之地養成羽翼而天津一隅之士夫氣節尤被其蹂躪者也若夫以幹濟之材登清切之地獨荷彼深情厚貌若將引爲臂助一旦情狀大異則拳裳去之無所顧藉則惟我執友華君璧臣一人君由內閣中書考入軍機處洊升領班章京光緒季年氏在樞臣職耳君負北中人望折節相待殷勤伊甚辛亥變作朝廷召氏充內閣總理大臣時君官閣丞閣丞爲新設專缺職守略如漢丞相府長史所以承總理之命而布政於中外各衙門者也總理權特重閣丞責亦特重時氏方高揭政治革新名義我有官守亦姑安之未幾而圖窮匕見君乃以省親謁假返里時則徵召之使絡繹道上愆君脅君近在親故而君赤石不奪以北海逸民自署氏既顛覆而承氏衣鉢者皆君平昔交游之列憑仗舊誼盡情牽引而君一意孤

行至今無崑山顧氏稍理鬢毛之感蓋君平生大節如此鉅嘗讀君所述封光祿公遺訓  
矣大致斥滅倫蕩紀之輩而歸本於綱常名教不能不麗諸人鉅敬題像贊獨以教忠二  
字闡之有是父乃有是子視陳太邱之後有羣荀朗陵之後有彧其家法爲何如君之克  
承家法而爲有清一代讀書人少少留面目者又何如也癸酉仲夏屈君七旬眉慶敬就  
鉅最所欽重者書之於冊俾夫後世尙論之士於振古奇局中緬想夫易所云獨立不懼  
遯世無悶者之尙有其人於物爲碩果於地爲砥柱於天爲啟明傳人完人巋然推畿南  
遺獻之宗焉是則君之所以爲壽者固別有在矣意所不盡綴以長句詞曰

我聞書家顏真卿英風浩氣挾以行南園肖之騰直聲到今君也艱且貞書者如也如平  
生要以人重爲定評忠義堂帖此後勅世俗譽之猶蚊蟲南齊孝子名宗英畫像終古頭  
鬢鬢君亦不髡報有清一髮所寄千鈞輕年來止酒師淵明矧復玉貌驚圍城請歌急就  
老復丁歲寒松柏此尋盟

合肥李星吾侍講七十徵壽啟

聞之仙李蟠根上符星象青蓮述德有明徵焉是以老氏道德經列諸子之首唐書宰相

表以宗賢爲多矧夫海內靈光人中屈軼紹建安文章之統肩洛陽忠孝之門如前頭品  
頂戴翰林院侍講合肥新吾李先生者乎先生爲勤恪公長君文忠公猶子慶基崇構烏  
弈光融始以 恩蔭拜郎官旋以甲第列侍從昔則無文不綜羣推藝苑之總持今則用  
晦而明甘作玉城之大隱凡夫奉親型家之道入官盡職之年尊師取友之方觀化頤生  
之要旣備見於文孫家美啟事中矣某等獨以爲百六姦迴之會惟遺獻宜崇三五代興  
之朝皆引年是尙敬惟先生人門第一遙接端卿亮節清風尤資仰鏡蓋論其世業則爲  
西平收京之家論其當官則備嗣眞值館之選論其高致則在唐爲愿無慚韓昌黎盤谷  
之文論其脩齡則在宋爲昉正師白樂天香山之會嗣暉非易兼德尤難固門業之盛乎  
亦邦家之光也今者歲在丁卯二月二十九日屆先生古稀慶辰復丁獻兆剛卯宜年際  
春日之載陽應福星而度世所冀高齋學士儒林丈人成毛潛在以介之鴻文娛張光弼  
可閒之晚境庶幾修道養壽颺祝史之徽言累世通家入祖庭之廣記云爾